



74
6640
47



74
6640
47



五禮通考卷第一百二十二

內廷供奉禮部右侍郎金匱秦蕙田編輯

李太僕總纂蘇都御史桐城方觀承同訂

兩淮都轉鹽運使德水盧見曾
直隸按察司副使元和宋宗元

參校

古禮一百二十二

功臣配享

蕙田案配享之典國家所以報功而勸忠也

周禮祭于大烝並及禘祫後世不廢焉

書盤庚茲于大享于先王爾祖其從與享之

傳古者天子錄功臣配食于廟

大享烝嘗也疏此大享于先王謂天子祭宗廟也言古者天子錄功臣配食于廟故臣之先祖得與享之也古者孔子據已而道前世也此殷時已然矣大享烝嘗者烝嘗是秋冬祭名謂之大享者以事各有對若烝嘗對禘祫則禘祫為大烝嘗為小若四時自相對則烝嘗為大禘祫為小知烝嘗有功臣與祭者案周禮司勳云凡有功者銘書于王之太常祭于大烝司勳詔之是也秋冬之祭尚及功臣則禘祫可知近代以來惟禘祫乃祭功臣配食時祭不及之也近代以來功臣配食各配所事之君若所事之君其廟已毀時祭不祭毀廟其君尚不陳氏大猷曰大勳勞之人時祭其臣固當止矣禘祫則毀廟之主亦在焉其時功臣亦當在也

陳氏大猷曰大勳勞之人方得配食非偏及有功者

五禮通考卷第一百二十二 功臣配享

木下中也
1991.4
寄贈

91-0724

蕙田案周禮祭于大烝之文則知大享專指烝而不及嘗矣蓋烝嘗同為大享而烝尤大

于嘗故報功臣焉注兼烝嘗恐非詩商頌長發允也天子降于卿士實維阿衡實左右商

王

蘇氏轍曰大禘之祭所及者遠卿士伊尹蓋與祭于禘者也商書曰茲子大享于先王爾祖其從與享之是禮也登其起于商之世歟

孔叢子書曰茲子大享于先王爾祖其從與享之季桓子問曰此何謂也孔子曰古者臣有大功死則必祀之于廟所以殊有績勸忠勤也盤庚舉其事以厲其世臣故稱焉桓子曰天子之臣有大功者則既然而矣諸侯之臣有大功者可以如之乎孔子曰勞能定國功加於民大臣死難雖食之公廟可也桓子曰其位次如何孔子曰天子諸侯之臣生則有列于朝死



則有位於廟其序一也

旨洛誥周公曰王肇稱殷禮祀于新邑咸秩無文子齊

曰工倅從王于周子惟曰庶有事今王即命曰記功宗

以功作元祀惟命曰汝受命篤弼傳言王當始舉殷家祭祀以禮

而祀之我整齊百官使從王于周行其禮典我惟曰庶幾有善政事今王就行

社命于洛邑曰當記人之功尊人亦當用功大小為序有大功則列大祀謂功施

民者惟天命我周邦汝受天命厚矣當輔大天命視羣臣有功者記載

之乃汝新即政其當盡自教眾官躬化之疏君知臣功則臣皆盡力

蔡氏沈曰殷盛也與五年再殷祭之殷同功宗功之

尊顯者蓋功臣皆祭于大烝而勤勞之最尊顯者則

為之冠故謂之元祀周公教成王即命曰記功之尊

顯者以功作元祀矣又惟命之曰汝功臣受此褒賞

之命當益厚輔王室蓋作元祀既以慰答功臣而又

勉其左右王室益圖久大之業也

蕙田案注疏以記功宗為記人之功尊人蔡

注疏以記功宗為記人之功尊人蔡

氏以為記有功之尊顯者二說不同蔡義為長

周禮夏官司勳王功曰勳注輔成王國功曰功注保全國民

功曰庸注法施于事功曰勞注以勞定治功曰力注制法成戰

功曰多注剋敵出奇若韓信陳凡有功者銘書于王之太常祭

于大烝司勳詔之注銘之言名也生則書于王旌以識其人與其功也死則

曰茲于大享先王爾祖其從與享之是也今漢祭功臣于廟庭說必祭功臣

在冬之烝祭者烝者眾也冬時物成者眾故祭功臣案彼書注以大享為烝嘗者

此舉冬祭物成者眾而言其嘗時亦祭之也或周

時直于烝時祭功臣殷時烝嘗俱祭禮異故也

蕙田案疏謂周於烝祭祭功臣殷於烝嘗皆

祭功臣此亦無可考

鄭氏錡曰王功者輔成王業勤勞王室輔幼孤以嗣王者之緒明王道以成王

者之治即是功而謂之勳勳有薰蒸之義謂其功之大薰蒸宇宙上達于王也

周公之有大勳勞是已國功者國爾忘家盡瘁國事凡所施為無非為國計者

即是功而謂之勳功者事有成效之義獨此名曰功蓋人臣立功正以保全王

國為主進而上名以勳功不足道也抑而丁則曰勞曰力之類皆不足正名其

功也惟為國而有成者正可謂之功民功者害為民除之利為民興之或便干

昔而不便於今則為民革之或與于前而廢于後則為民舉之即是功而謂之

庸庸者用也事功者或從王事或任國事或有所營為或有所創制驅勉從之

不異其適我也即是功而謂之勞勞有經營艱苦之意也治功者或平水土或

闢草萊或任土地或疏導溝洫即是功而謂之力力謂其用力以作為也戰功

者戰以伐謀為上而以伐兵為下以正合以奇勝執倖折馘斬將

舉旗奏凱而旋者是也即是功而謂之多多者算數過人之義

又曰太常之書司常之職也大烝之祭大宗伯之職也司勳知立功之人當銘

則詔之使銘當祭則詔之使祭銘于太常使與日月同其久也祭于大烝使與

祖宗之神同享乎盛祭也可以見其報之之厚

蕙田案詔字當以鄭氏錡之說為長

王氏昭禹曰必使司勳詔之則以

有大功者其貳藏于司勳故也

王氏安石曰大烝冬之大享當

是時百物皆報焉祭有功宜矣

春秋定公十四年左氏傳梁嬰父惡董安于謂知文子

曰不殺安于使終為政于趙氏趙氏必得晉國盍以其

先發難也討于趙氏文子使告于趙孟曰范中行氏雖

信為亂安于則發之是安于與謀亂也晉國有命始禍

者死二子既伏其罪矣敢以告趙孟患之安于曰我死

而晉國寧趙氏定將焉用生人誰不死吾死莫矣乃縊而死趙孟尸諸市而告於知氏曰主命戮罪人安于既伏其罪矣敢以告知伯從趙孟盟而後趙氏定祀安于於廟注趙氏廟 禮禮臣有大功配食于廟周禮司動云凡有功者銘書于王之太常祭于大烝司勳詔之尚書盤庚云茲于大享于先王爾祖其從與享之孔安國云古者天子錄功臣配食于廟大享烝嘗也天子既有此禮諸侯或有之今趙氏祀安于於趙氏之廟其意亦如此也

蕙田案觀孔叢子所載孔子與季桓子問答

語則知自定公以前諸侯之國無有以臣配

享者故孔穎達云諸侯或亦有之然則以家

臣而祀于私廟僭禮自趙簡子始也

右經傳功臣配享

漢舊儀宗廟祭功臣四十人食堂下惟御僕滕公祭於

廟門外塾

杜佑通典漢制祭功臣于庭生時侍饌于堂死則降

庭位與士庶為列

三國魏志明帝本紀青龍元年夏五月壬申詔祀故大

將軍夏侯惇大司馬曹仁車騎將軍程昱于太祖廟庭

注魏書載詔曰昔先王之禮於功臣存則顯其爵祿

沒則祭于大烝故漢氏功臣祀于廟庭大魏元功之

臣功勳優著終始休明者其皆依禮祀之于是以惇

等配享

齊王本紀正始四年秋七月詔祀故大司馬曹真曹休

征南大將軍夏侯尚太常桓階司空陳羣太傅鍾繇車

騎將軍張郃左將軍徐晃前將軍張遼右將軍樂進太

尉華歆司徒王朗驃騎將軍曹洪征西將軍夏侯淵後

將軍朱靈文聘執金吾臧霸破虜將軍李典立義將軍

龐德武猛校尉典韋于太祖廟庭

五年冬十一月癸卯詔祀故尚書令荀攸于太祖廟庭
注臣松之以為故魏氏配享不及荀彧蓋以其末年
異議又位非魏臣故也至於升程昱而遺郭嘉先鍾
繇而後荀攸則未詳厥趣也徐佗謀逆而許褚心動
忠義之至遠同于日磾且潼關之危非褚不濟褚之
功烈有過典韋今祀韋而不及褚又所未達也

六年冬十一月祫祭太祖廟始祀前所論佐命臣二十
一人

嘉平三年十一月有司奏諸功臣應享食于太祖廟者
更以官為次太傅司馬宣王功高爵尊最在上

陳留王本紀景元三年詔祀故軍諮祭酒郭嘉于太祖
廟庭

通典魏高堂隆議曰案先典祭祀之禮皆依生時尊卑

之敘以為位次功臣配享于先王像生時侍燕禮大
夫以上皆升堂以下則位于庭其餘則與君同牢至於
俎豆薦羞唯君備公降于君卿大夫降于公士降于大
夫使功臣配食于烝祭所以尊崇其德明其勳以勸嗣
臣也議者欲從漢氏祭之于庭此為貶損非寵異之謂
也貴者取貴骨賤者取賤骨今使配食者因君之牢以
貴賤為俎庶合事宜周志曰勇則害上不登于明堂其
用謂之勇言有勇而無義死不登堂而配食此即配食
之義位在堂之明審也下為北面三公朝立之位耳燕
則脫履升堂不在庭也凡獻爵有十二九七五三之差
君禮大夫三獻太祝令進三爵于配食者可也

蕙田案左傳勇則害上不登于明堂杜注云
明堂祖廟也所以策功序德故不義之士不

得升孔疏云鄭元以為明堂在國之陽與祖廟別處左氏舊說及賈逵盧植蔡邕服虔等皆以祖廟與明堂為一故杜同之祭統云古者明君必賜爵祿于太廟傳稱公行還告廟舍爵策勳是明堂之中所以策功序德故不義之人不得升之也據注疏二家是謂生而入廟受賞耳魏高堂隆則以為登堂配食乃指死後而言今案狼臆前則曰吾未得死所後則曰死而不義非勇也是引周志之言明指死後審矣高堂隆在杜預以前釋經必有所依據也

右漢魏

晉書武帝本紀咸寧元年八月壬寅以故太傅鄭冲太

荀顛司徒石苞司空裴秀驃騎將軍王沈安平獻王孚等及太保何曾司空賈充太尉陳騫中書監荀勗平南將軍羊祜齊王攸等皆列于銘饗

文獻通考散騎常侍任茂議案魏功臣配食禮敘六功之勳祭陳五事之品或祀之於一代或傳之于百代蓋社稷五祀所謂傳之於百代者古之王臣有明德大功若句龍之能平水土柱之能殖百穀則祀社稷異代不廢也昔湯既勝夏欲遷其社不可乃遷稷而周棄德可代柱而句龍莫廢也若四敘之屬分主五方則祀為貴神傳之異代載之春秋非此之類則雖明如咎繇勳如伊尹功如呂尚各於當代祀之不祭于異代也然則伊尹于殷雖有王功之茂不配食于周之清廟矣今之功臣論其勳蹟比咎繇伊尹呂尚猶或未及凡云配食各

配食于主也今主遷廟臣宜從享大司馬石苞等議魏代功臣宜歸之陳留國使修常祀允合事理

宋書長沙景王傳太祖元嘉九年詔曰古者明王經國司勳有典平章以馭德刑班瑞以醜功烈銘徽庸于鼎彝配祫祀于清廟是以從享先王義存商誥祭于大烝禮著周典自漢迄晉世崇其文王猷既昭幽顯咸秩先皇經緯天地撥亂受終駿命爰集光宅區宇雖聖明淵運三靈允協抑亦股肱翼亮之勤祈父宣力之効故使持節侍中都督南徐兗二州揚州之晉陵京口諸軍事太傅南徐兗二州刺史長沙景王故侍中大司馬臨川烈武王故司徒南康文宣公穆之侍中衛將軍開府儀同三司錄尚書事揚州刺史華容縣開國公弘使持節散騎常侍都督江州豫州西陽新蔡晉熙四郡軍事征

南大將軍開府儀同三司江州刺史永修縣開國公道濟故將軍青州刺史龍陽縣開國侯鎮惡或履道廣流秉德冲邈或雅量高仰風鑒明遠或識唯知正才略開邁咸文德以熙帝載武功以隆景業固以倅蹤姬旦方軌伊召者矣朕以寡德纂成鴻緒每惟道勳思遵令典而太常未銘從祀尚闕鑒寐欽屬永言深懷便宜敬是前式憲茲嘉禮勒功天府配祭廟庭俾示徽章垂美長世茂績遠猷永傳不朽

南齊書禮志永明十年詔故太宰褚淵故太尉王儉故司空柳世隆故驃騎大將軍王敬則故鎮東大將軍陳顯達故鎮東將軍李安民六人配享太祖廟庭祠部郎何謹之議功臣配享累行宋世檢其遺事題列坐位具書贈官爵諡及名文不稱主便是設板也白虎通云祭

之有主孝子以繫心也揆斯而言升配廟庭不容有主
宋時板度既不復存今之所制大小厚薄如尚書召板
為得其眾有司攝太廟舊人亦云見宋功臣配享坐板
與尚書板相似

隋書禮儀志武帝即位遷主太廟春祠夏禘秋嘗冬烝
并臘一歲凡五謂之時祭三年一禘五年一祫謂之殷
祭禘以夏祫以冬皆以功臣配天監三年何佟之議曰
禘於首夏物皆未成故為小祫於秋冬萬物皆成其禮
尤大司勳列功臣有六皆祭于大烝知祫尤大乃及之
也近代禘祫竝不及功臣有乖典制宜改詔從之自是
祫祭乃及功臣

陳書文帝本紀天嘉二年九月甲寅詔曰姬業方闡望
載渭濱漢歷既融道通圯上若乃摛精辰宿降靈惟岳

風雲有感夢寐是求斯固舟楫鹽梅遞相表裏長世建
國罔或不然至于銘德太常從祀清廟以貽厥後來垂
諸不朽者也前皇經濟區宇裁成品物靈貺式甄光膺
寶命雖謨明濬發幽顯協從亦文武賢能翼宣王業故
大司馬驃騎大將軍瑱故司空文育故平北將軍開府
儀同三司僧明故中護軍穎故領軍將軍擬或締構艱
難經綸夷險或摧鋒冒刃殉義遺生或宣哲協規網繆
帷幄或披荆汗馬終始勤劬莫不罄誠悉力屯泰以之
朕以寡昧嗣膺丕緒永言勳烈思弘典訓便可式遵故
實載揚盛軌可竝配食高祖廟庭俾茲大猷永傳宗祏
世祖本紀天嘉五年三月壬午詔以故護軍將軍周鐵
虎配食高祖廟庭

周鐵虎傳天嘉五年世祖又詔曰漢室功臣形寫宮

五禮通考卷三十一 功臣配享

觀魏朝猛將名配宗祧功烈所以長存世代因之不朽故侍中護軍將軍青冀二州刺史沔陽縣開國侯鐵虎誠節鯁亮力用雄敢王業初基行間累及垂翅賊壘正色寇庭古之遺烈有識同壯隕身不屈雖隆榮等營魂易遠言追嘉惜宜仰陪壻寢恭頒享奠可配食高祖廟庭

宣帝本紀大建四年秋九月景寅以故太尉徐度儀同杜稜儀同程靈洗配食高祖廟庭故車騎將軍章昭達配食世祖廟庭

右晉宋齊梁陳

伽藍記北魏廣陵王卽皇帝位爾朱世隆加儀同三司尙書令東平王餘官如故贈太原王相國晉王加九錫立廟于芒嶺首陽山上舊有周公廟世隆欲以太原王

功比周公故立此廟廟成爲火所災有一柱焚之不盡後三日雷雨震電霹靂擊爲數段柱下石及廟瓦皆碎于山下復命百官議太原王配享司直劉季明議云不合世隆問其故季明曰若配世宗於宣武無功若配孝明親害其母若配莊帝爲臣不忠爲莊帝所戮以此論之無所配也世隆怒曰卿亦合死季明曰下官旣爲議臣依禮而言不合聖心俘翦惟命議者咸歎季明終得無恙

北齊書孝昭帝本紀皇建元年十一月庚申詔以故太師尉景故太師竇泰故太師太原王婁昭故太宰章武王庫狄干故太尉段榮故太師万俟普故司徒蔡儁故太師高乾故司徒莫多婁貸文故太保劉貴故太保封祖裔故廣州刺史王懷十二人配享太祖廟庭故太師

清河王岳故太宰安德王韓軌故太宰扶風王可朱渾
道元故太師高昂故大司馬劉豐故太師万俟受洛干
故太尉慕容紹宗七人配享世宗廟庭故太尉河東王
潘相樂故司空薛修義故太傅破六韓常三人配享顯
祖廟庭

北周書明帝本紀二年冬十二月癸亥太廟成辛巳以
功臣琅琊貞獻公賀拔勝等十三人配享太祖廟庭

右北魏北齊北周

隋書禮儀志禘祫之月則停時饗而陳諸瑞物及伐國
所獲珍奇于廟庭及以功臣配饗

舊唐書太宗本紀貞觀十四年冬十月己卯詔以贈司
空河間元王孝恭贈陝東道大行臺尚書右僕射鄖節
公殷開山贈民部尚書渝襄公劉政會等配享高祖廟

庭

通典貞觀十六年有司言禮祫享功臣配享于廟庭禘
享則不配後令禘祫之日功臣竝得配享請集禮官學
士等議太常卿韋挺等議曰古者臣有大功享祿其後
子孫率禮潔粢豐盛祠烝嘗四時不輟國家大祫又
得配焉所以昭明其勳尊崇其德以勸嗣臣也其禘及
時享功臣皆不應享故周禮六功之官皆配大烝而已
先儒皆以大烝為祫祭梁初誤禘功臣左丞何佟之駁
議武帝允而依行降暨周齊俱遵此義竊以五年再殷
合諸天道之大小小則人臣不與大則兼及有功禮禘
無配功臣誠謂理不可易從之

顏師古功臣配享議曰竊以肅恭禋祀經邦彝訓追
遠念功歷代鴻典於穆清廟備孝享于吉蠲股肱良

哉像銘常之配侑爰發明詔俾命率由秩宗致請博
謀僚列爾雅說祀禘爲大祭公羊傳義大事爲禘何
休所釋又異鄭元然皆一配之文曾無重祀之證是
非眾論雖曰踳駁隆殺二端厥趣可覩謹案禘者合
食禘乃禘祭禘小于禘理則非疑商書稱從與其大
享周禮著祭于大烝是知小祀不及功臣其事又無
可感魏晉以降莫不通行中間雖經差失梁朝又以
矯正有齊立號朝宗河朔周氏命歷卜食咸陽修定
禮儀皆有憑據同遵此典未嘗釐革今欲更改實謂
非宜又尋古之配祭皆在于冬據其時月益明非禘
況乎臣之立功各因所奉享祀之日從主升配禘之
爲祭自于本室廟未毀者不至太祖之庭君既不來
而臣獨當祀列對揚尊極乃非所宜今請禘配功臣
禘則不豫依經合義進退爲允謹議

蕙田案禘祭無配享其禮極是特所謂禘者
非古之禘耳

文獻通考唐太宗貞觀禮禘享功臣配享于廟庭禘享
則不配後又令禘禘之日功臣並得配享初太常卿韋
紹等議功臣禘享之日配享于廟庭禘及時享則皆不
預其議遂行至開元初復令禘之日亦皆配享非舊典
也配享位在各帝廟庭太階之東少南西向以北爲上
舊唐書高宗本紀貞觀二十三年皇太子卽位九月丙
寅贈太尉梁國公元齡贈司徒申國公士廉贈左僕射
蔣國公屈突通並配食太宗廟庭
顯慶五年二月甲午祀舊宅以武士護殷開山劉政會
配食

甲宗本紀神龍二年閏二月停許敬宗配享以贈太尉
鄭公魏徵配享太宗廟

元宗本紀開元六年六月乙酉制以故侍中桓彥範敬
暉故中書令兼吏部尚書張柬之故特進崔元暉故中
書令袁恕已配享中宗廟庭故司空蘇瓌故左丞相太
子少保郴州刺史劉幽求配享睿宗廟庭

文獻通考順宗既葬議祧遷中宗廟有司疑曰五王有
安社稷功若遷中宗則配享永絕判集賢院事蔣乂曰
禘祫功臣乃合食太廟中宗廟雖毀而禘祫竝陳太廟
此則五王配食與初一也由是遷廟遂定

開元禮祫禘以功臣配享享日未明一刻太廟令布功
臣神座于太廟之庭吏部尚書贈司空鄖國公殷開山
光祿卿渝國公劉政會開府儀同三司淮安靖王神通

禮部尚書贈司空河間元王孝恭配享高祖廟庭太階
之東少南西向以北爲上司空贈太尉梁國文昭公房
元齡特進贈司空鄭國文貞公魏徵洛州都督贈尚書
左僕射蔣國忠公屈突通開府儀同三司贈司徒申國
文獻公高士廉配享太宗廟庭少南西向以北爲上司
空太子太師贈太尉英國貞武公李勣中書令贈尚書
右僕射高唐縣公馬周尚書左僕射兼太子少傅北平
縣公張行成配享高宗廟庭少南西向以北爲上侍中
譙國公桓彥範侍中平陽郡公敬暉中書令兼吏部尚
書濮陽郡公張柬之特進博陵郡公崔元暉中書令南
陽郡公袁恕已配享中宗廟庭少南西向以北爲上尚
書左僕射太子少傅贈司空許國文貞公蘇瓌尚書左
丞相太子少保徐國公劉幽求配享睿宗廟庭少南西

向以北爲上諸座各設版于座首其版文各具題官爵姓名每座各設壺罇二于左北向元酒在西加勺罇置爵于罇下設洗于終獻罍洗東南北向太廟令與良醢令以齊實罇如常堂上設饌訖太官令帥進饌者出奉饌入祝迎引于座左各設於座前太官令以下出祝還罇所亞獻將畢贊引引獻官詣罍洗盥手洗爵詣酒罇所執罇者舉罇獻官酌酒諸助奠者皆酌酒訖贊引引獻官進詣首座前東面奠爵贊引引還本位于獻官進奠諸助奠者各進奠于座還罇所于堂上徹豆祝進首座前徹豆還罇所

舊唐書禮儀志舊儀高祖之廟則開府儀同三司淮安王神通禮部尚書河間王孝恭陝東道大行臺右僕射鄖國公殷開山吏部尚書渝國公劉政會配饗太宗之

廟則司空梁國公房元齡尚書右僕射萊國公杜如晦尚書左僕射申國公高士廉配饗高宗之廟則司空英國公李勣尚書左僕射北平縣公張行成中書令高唐縣公馬周配饗中宗之廟則侍中平陽郡王敬暉侍中扶陽郡王桓彥範中書令南陽郡王袁恕己配饗睿宗之廟則太子太傅許國公蘇瓌尚書左丞相徐國公劉幽求配饗天寶六載太廟配饗功臣高祖室加裴寂劉文靜太宗室加長孫無忌李靖杜如晦高宗室加褚遂良高季輔劉仁軌中宗室加狄仁傑魏元忠王同皎等十一人

文獻通考高祖廟六人神通殷開山劉政會竝貞觀十四年十月十五日勅武士護顯慶四年三月七日勅文明元年停裴寂劉文靖竝天寶六載正月十三日勅

武士護裴叔劉文靜太宗廟七人房元齡高士廉屈突通竝貞觀二

十三年九月二十四日勅至永徽四年二月房元齡以

子遺愛反停配享魏徵神龍二年閏二月十五日勅長

孫無忌李靖杜如晦竝天寶六載正月十二日勅開元禮無長孫

無忌李靖杜如晦高宗廟六人李勣張行成許敬宗馬周竝垂拱

二年正月十一日勅其許敬宗神龍二年閏二月一日

有勅停褚遂良高季輔劉仁軌竝天寶六載正月十二

日勅開元禮無許敬宗褚遂良高季輔劉仁軌中宗廟八人桓彥範敬暉張柬之

崔元暉袁恕已竝開元六年六月二十二日勅狄仁傑

魏元忠王同皎竝天寶六載正月十二日勅開元禮無狄仁傑魏元忠王同皎

睿宗廟二人蘇瓌劉幽求竝開元六年六月二十三日

勅

蕙田案舊唐書於配享太宗諸臣前既以杜

如晦列於其中後於所加諸臣內又復列入

杜如晦故沈炳震曰如晦已經配享太宗此

云加誤但檢文獻通考貞觀二十三年勅有

屈突通而無杜如晦至天寶六載始與長孫

無忌李靖同加入則舊唐書後所云加入杜

如晦乃不誤而所誤在前之以屈突通為杜

如晦也沈炳震想未見通考故反以加為誤

耳又案文獻通考高祖配享有武士護太

宗配享有魏徵中宗配享有張柬之崔元暉

舊唐書志俱不載其武士護配而旋停姑置

弗論餘皆作志之漏略也

元宗廟三人贈太師燕文正公張說贈太子太師代國

公郭元振中書令趙國公王琚檢年月未復肅宗廟二人贈太

師韓文憲公苗晉卿大曆四年十月七日勅贈太尉翼
獻穆公裴冕元和四年八月勅

唐書裴冕傳始肅宗廟惟苗晉卿配享冕卒後二十
餘年有蘇正元者奏言肅宗爲元帥時師纔一旅冕
於草創中甄大義以勸進收募驍勇幾十餘萬旣逾
月房瑄來又一年而晉卿至今晉卿從祀而冕乃不
與有詔冕配享肅宗廟

代宗廟一人贈太尉汾陽忠武王郭子儀建中二年十
一月勅德宗廟三人贈太師西平忠武王李晟贈太尉
忠烈公段秀實竝元和四年八月勅贈太師忠武公渾
瑊元和四年九月四日勅憲宗廟四人贈司徒宣懿公
杜黃裳贈太師裴度會昌六年十月勅贈司徒威武公
高崇文贈太尉李愬會昌六年十一月勅

玉海宣宗大中四年五月宗正少卿李從易奏自武德
以來功臣列在祀典者三十八人

文獻通考後唐明宗長興二年詔以故昭義節度使李
嗣昭故幽州節度使周德威故汴州節度使符存審配
享莊宗廟庭

右隋唐五代

宋史眞宗本紀咸平二年二月丙申以趙普配享太祖
廟庭八月乙亥以太師贈濟陽郡王曹彬配享太祖廟
庭司空贈太尉中書令薛居正忠武軍節度使贈中書
令潘美右僕射贈侍中石熙載配享太宗廟庭
禮志咸平二年始詔以趙普配享太祖廟庭繼以宋白
等議又以曹彬配享太祖以薛居正潘美石熙載配享
太宗廟庭仍奏告本室禘祫皆配之祀日有司先事設

三禮通考卷三十三
三十一
幄次布褥位于廟庭東門內道南當所配室西向設位
板方七寸厚一寸半邊豆各二簋簋俎各一知廟卿奠
爵再拜

趙普傳真宗咸平二年詔曰故太師贈尚書令追封
韓王趙普識冠人彝才高王佐翊戴興運光啟鴻圖
雖呂望肆伐之勳蕭何指蹤之効殆無以過也自輔
弼兩朝周旋三紀茂巖廊之碩望分屏翰之劇權正
直不回始終無玷謀猷可復風烈如生宜預享于大
烝永同休于宗祏茲為茂典以答舊勳其以普配享
太祖廟庭

乾興元年詔從翰林禮官參議以右僕射贈太尉中書
令李沆贈太師尚書令王旦忠武軍節度使贈中書令
字繼隆配享真宗

嘉祐八年詔以尚書右僕射贈尚書令王曾太尉贈尚
書令呂夷簡彰武軍節度使贈侍中曹瑋配享仁宗
神宗本紀神宗熙寧八年六月戊午太師魏國公韓琦
薨己未以琦配享英宗廟庭
元豐元年閏正月己亥太傅兼侍中曾公亮薨癸卯以
公亮配享英宗廟庭

建炎以來朝野雜記祖宗故事大臣配享皆祔廟後
議之若趙韓王曹秦王之配享太祖蓋真宗咸平時
而韓魏王曾魯公之配享英宗皆其身薨日降制亦
在祔廟十數年後

宋史禮志熙寧未嘗詔太常禮院講求親祠太廟不及
功臣禮例至是禘祫外親享太廟竝以功臣與又從太
常禮院請配享功臣以見贈官書板位

文獻通考元豐三年詳定郊廟奉祀禮文所言謹案書盤庚曰茲于大亨于先王爾祖其從與享之周禮司勳凡有功者祭于大烝然則書之所謂大亨卽禮之所謂大烝也烝冬祭也謂之大者物成眾多之時其祭比三時爲大也方是時百物皆報焉祭有功宜矣禮記祭統衛孔悝之鼎銘曰勤大命施于烝彝鼎後世烝祭不及功臣旣不合禮而禘祫及之事不經見梁初誤禘功臣何佟之以爲夏物未成而禘功臣爲非典禮唐韋挺亦云今禘祫以功臣配享而冬烝不及與經不合蓋因仍之誤也伏請每遇冬烝以功臣配享其禘祫配享罷之詔凡冬享禘祫及親祠功臣竝配享

宋史哲宗本紀元祐元年六月戊申以富弼配享神宗廟庭

紹聖元年夏四月甲寅以王安石配享神宗廟庭

三年二月癸酉罷富弼配享神宗廟庭

禮志元祐初從吏部尙書孫永等議以故司徒贈太尉富弼配享神宗紹聖初又以守司空贈太傅王安石配三年罷富弼配謂弼得罪於先帝也

蘇氏軾論周禮擅議配劄子本朝自祖宗以來推擇元勳重望始終全德之臣以配食列聖蓋自天子所不敢專必命都省集議其人非天下公議所屬不在此選奏議旣上詔云恭依冊告宗廟然後敢行其嚴如此豈有旣行之後復使疏遠小臣各出私意以議所配若置而不問則宗廟不嚴而朝廷輕矣褻矣安石平生所爲是非邪正中外具知難逃聖覽先帝蓋亦知之故置之閑散終不復用今已改青苗等法而

廢退安石黨人呂惠卿李定之徒至於學校貢舉亦已罷斥佛老禁止字學大議已定行之數年而先帝配享已定用富弼天下翕然以為至當種復何敢建此議意欲以此嘗試朝廷漸進邪說伏望聖慈重賜責降以儆在位

崇甯元年詔以觀文殿大學士贈太師蔡確配享哲宗廟庭

政和五禮新儀配享功臣之位設于殿庭之次趙普曹彬位于橫街之南道西東向第一次薛居正石熙載潘美位于第二次李沆王旦李繼隆位于第三次俱北上王曾呂夷簡曹瑋位于橫街之南道東西向第一次韓琦曾公亮位于第二次王安石位于第三次蔡確位于第四次俱北上惟冬享祫享徧設祭位

建炎初詔奪蔡確所贈太師汝南郡王追貶武泰軍節度副使更以左僕射贈太師司馬光配享哲宗既又罷王安石復以富弼配享神宗

趙鼎傳高宗即位除鼎司勳郎官久雨詔求闕政鼎言自熙甯開王安石用事變祖宗之法而民始病假闕國之謀造生邊患與理財之政窮困民力設虛無之學敗壞人才至崇甯初蔡京託紹述之名盡祖安石之政凡今日之患始於安石成於蔡京今安石猶配享廟庭而京之黨未除時政之闕莫大於是上為罷安石配享

宋會要紹興四年太常少卿江端友請明堂前一日差官詣配祀功臣位行禮緣即今權于溫州真華宮奉安宗廟比在京事體不同欲依紹興元年明堂更

不排辦從之

宋史高宗本紀紹興八年三月壬寅定以故相韓忠彥配享徽宗廟庭

揮塵前錄本朝曹武惠配享太祖武穆配享仁宗韓忠獻配享英宗文定配享徽宗父子配享自昔所無也

禮志紹興十八年二月監登聞鼓院徐璉言國家原廟佐命配享當時輔弼勳勞之臣繪像廟庭以示不忘累朝不過一十餘人今之臣僚與其家之子孫必有存其繪像者望詔有司尋訪復摹于景靈宮庭之壁非獨假寵功臣之子孫所以增重祖宗之德業以爲臣子勸遂下諸路轉運司委所管州軍尋訪各家韓王趙普周王曹彬太師僻居正石熙載鄭王潘美

太師李沆王旦李繼隆王曾呂夷簡侍中曹瑋司徒韓琦太師曾公亮富弼司馬光韓忠彥各令摹寫貌像投納繪于景靈宮之壁

紹興二十七年六月戊午初命太廟冬享祭功臣孝宗本紀乾道五年九月甲子詔侍從臺諫集議欽宗配享功臣

禮志乾道五年九月太常少卿林栗等言欽宗皇帝廟庭尙虛配享當時遭值艱難淪胥莫救罕可稱述而以身殉國名節暴著不無其人雖生前官品不應配享之科事變非常難拘定制乞特詔集議吏部尙書汪應辰奏當時死事之臣皆有次第褒贈若今配享欽廟典故所無如創行之又當訪究本末差次輕重有所取舍尤不可輕易竊謂配享功臣若依唐制各廟旣無其人則

當缺之迺罷集議欽宗一廟遂無配享

文獻通考侍右郎官曾逮言昔元祐中神宗未有配享朝廷依例權塑二侍臣吏部尚書汪應辰言欽宗所圖共政之臣皆未有能勝其任者若應故事姑令備數上非所以尊宗廟下非所以勸有功誠如太常所言當時死事之臣非一今欲令配享考究本末差次輕重有所取捨尤不可輕易昔唐文宗武宗皆無配享功臣蓋崇奉祖宗必審其實必當於理不虛尙文飾以苟塞人情而已既無可配享者乞更不集議從之

孝宗本紀淳熙十五年三月癸丑用洪邁議以呂頤浩趙鼎韓世忠張俊配享高宗廟庭

禮志淳熙中高宗祔廟翰林學士洪邁言配食功臣先

期議定臣兩蒙宣諭欲用文武臣兩人文臣故宰相贈太師秦國公諡忠穆呂頤浩特進觀文殿大學士諡忠簡趙鼎武臣太師斬王諡忠武韓世忠太師魯王諡忠烈張俊此四人皆一時名將相合于天下公論議者皆以爲宜遂從之祕書少監楊萬里獨謂丞相張浚不得配食爲非爭之不得因去位焉

清波雜志國朝配享功臣于太廟橫街南東西相向設位太祖室趙普曹彬太宗室薛居正石熙載眞宗室李沆王旦李繼隆仁宗室王曾呂夷簡英宗室韓琦曾公亮神宗室富弼曹瑋哲宗室司馬光徽宗室韓忠彥高宗室呂頤浩趙鼎韓世忠張俊視祖宗文武臣各用二人侑食蓋中興將相勳烈之盛不得而遺也

紹興五年十二月以左丞相贈太師魯國公陳康伯配享孝宗廟庭

建炎以來朝野雜記孝宗既祔廟詔以故相陳康伯侑食寶文閣待制吳總上疏請以其父璘配享廟庭不報

宋史禮志初仁宗天聖中郊祀詔錄故相李昉宋琪呂端張齊賢畢士安王旦執政李至王沔溫仲舒及陳洪進等子孫以官元豐中詔景靈宮繪像舊臣推恩本支下兩房以上上不食祿者均有無取齒長者若子孫亦繪像本房不食祿更不取別房紹聖初林希請稽考慶厯以後未經編次臣僚其子孫應錄用者以次編定尋詔趙普社稷殊勳其諸孤有無食祿者各官其一子以長幼爲序毋過三人崇甯初詔哲

宗繪像文武臣僚並與子若孫一人初品官若子孫眾多毋過家一人又錄藝祖功臣呂餘慶族孫偉及司徒富弼孫直柔直道以官使奉其祀靖康初臣僚言司馬光之後再絕復立族子楨楨亦卒今雖有子而光遺表恩澤已五十年不可復奏請許移奏見存曾孫使之世祿從之

甯宗本紀嘉泰元年春正月庚午以葛邲配享光宗廟庭

嘉定十四年八月乙丑追封史浩爲越王改諡忠定配享孝宗廟庭

理宗本紀端平二年八月乙卯以太師趙汝愚配享甯宗廟庭仍圖像于昭勳崇德之閣

右宋

遼史興宗本紀重熙二十一年八月戊子太尉烏者薨
詔配享聖宗廟

金史禮志天德二年二月太廟祫享有司擬上配享功
臣詔以撒改辭不失斜也杲幹魯阿思魁忠東向配太
祖位以粘哥宗翰幹里不宗望闍母婁室銀朮可西向
配太祖位

大定三年十月祫享又以斜也幹魯撒改習失阿思魁
配享太祖宗望闍母宗翰婁室銀朮可配享太宗其後
次序屢有更易

世宗本紀大定八年十月乙未命圖畫功臣于太祖廟
其未立碑者立之

禮志大定八年上命圖畫功臣于太祖廟有司第祖宗
佐命之臣勳績之大小官資之崇卑以次上聞乃定左

廡開府金源郡王撒改皇伯太師右副元帥宋王宗望
開府金源郡王幹魯皇伯太師梁王宗弼開府金源郡
王婁室皇叔祖元帥左都監魯王闍母開府隋國公阿
離合懣儀同三司充國公劉彥宗右丞相齊國簡懿公
韓企先特進宗人辭不失右廡太師秦王宗翰皇叔祖
遼王杲開府金源郡王習失開府金源郡王完顏希尹
太傅楚王宗雄開府前燕京留守金源郡王完顏銀朮
可開府金源郡王完顏忠金源郡王完顏撒離喝特進
宗人幹魯古右丞相金源郡王紇石烈志甯
大定十六年左廡遷梁王宗弼于幹魯上 十八年黜
辭不失而次蒲家奴于阿離合懣之下 二十二年增
皇伯太師遼王斜也撒改宗幹宗翰宗望其下以次列
章宗本紀明昌四年三月甲午定配享功臣

禮志明昌四年次序始定東廊皇叔祖遼智烈王斜也
杲皇伯太師遼忠烈王宗幹魯皇伯太師右副元帥
宋桓肅王訛魯補宗望開府儀同三司金源郡毅武王
習失開府儀同三司金源郡貞憲王完顏谷神希尹太
傅楚威敏王謀良虎宗雄開府儀同三司燕京留守金
源郡襄武王完顏銀朮可開府儀同三司金源郡明毅
王完顏忠阿思魁金源郡莊襄王杲撒離喝特進宗人
幹里古莊翼特進完顏辭不失威敬太師尚書令淄忠
烈王徒單克甯太師尚書令南陽郡文康王張浩西廊
開府儀同三司金源郡忠毅王撒改太師秦桓忠王粘
罕宗翰皇伯太師梁忠烈王幹出宗弼開府儀同三司
金源郡剛烈王幹魯開府儀同三司金源郡莊義王完
顏婁室皇叔祖元帥左都監魯莊明王闍母開府儀同

三司隋國剛憲公阿离合懣開府儀同三司豫國襄毅
公蒲家奴昱開府儀同三司兗國英敏公劉彥宗右丞
相齊國簡懿公韓企先太保尚書令廣平郡襄簡王李
石開府儀同三司右丞相金源郡武定王紇石烈志甯
開府儀同三司左丞相沂國公僕散忠義儀同三司左
丞相崇國公紇石烈良弼右丞相莘國公石琚右丞相
申國公唐括安禮開府儀同三司平章政事徒單合喜
參知政事宗敘每一朝爲一列著爲令

章宗本紀明昌五年閏十月丙寅以代國公歡都等五
人配享世祖廟庭
禮志明昌五年閏十月丙寅以儀同三司代國公歡都
銀青光祿大夫治訶特進劾者開府儀同三司益納儀
同三司拔達配享世祖廟庭

享日竝出神主前廊序列昭穆應圖功臣配享廟庭各配所事之廟以位次爲序

王圻續通考南陽郡王完顏襄壽國公張萬公皆配享章宗廟庭平章政事延安郡王僕散端尙書右丞壽國公高汝礪宰相福興皆配享宣宗廟庭

完顏賽不傳正大三年宣宗廟成將禘祭議配享功臣論者紛紜賽不爲大禮使因言丞相福興死王事七斤謹守河南以迎大駕功宜配享議遂定

元史祭祀志英宗初博士言今冬祭卽烝也天子親裸太室功臣宜配享事弗果行

右遼金元

明會典洪武二年孟春享太廟以功臣七人配遣官分獻讀祝

王圻續通考洪武二年正月享太廟以功臣廖永忠俞通海張德勝桑世傑耿再成胡大海趙德勝配享設青布幃六開于太廟庭中內設配享功臣位籩豆各二實以栗棗牛脯葵菹鹿醢簋各二實以黍稷稻粱羊豕體各一遣官分獻其分獻儀皇帝行亞獻禮將畢分獻官各詣盥洗所盥手洗爵酌酒諸執事官皆酌酒于爵獻官進詣功臣第一位前上香奠爵諸執事官各進爵于各神位前讀祝官讀祝訖獻官復位其配享祝文曰朕以孟春嚴奉廟享追念忠烈輔成開基爰用牲醴陳于廟庭英靈如生尙其與享

明史禮志洪武三年定配享功臣常遇春以下凡八位春夏於仁祖廟西廡秋冬於德祖廟西廡設位東向遂罷幃次之設更定三獻禮皇帝初獻時獻官卽分詣行

五禮通考卷三十三功臣配享

三

禮不拜

明會典洪武三年定親王從享皆設位于東廡西向功臣配享皆設位于西廡東向

明史禮志洪武三年定以皇伯考壽春王王夫人劉氏爲一壇皇兄南昌王霍邱王下蔡王安豐王霍邱王夫人翟氏安豐王夫人趙氏爲一壇皇兄蒙城王盱眙王臨淮王臨淮王夫人劉氏爲一壇後定夫人皆改稱妃皇姪寶應王六安王來安王都梁王英山王山陽王昭信王爲一壇凡一十九位春夏于仁祖廟東廡秋冬及歲除於德祖廟東廡皇帝行初獻禮時獻官詣神位分獻四年進親王於殿內東壁

王圻續通考明太祖洪武二年壽春十五王進侑四祖廟案壽春於孝陵爲伯南昌七王兄寶應七王從

于也余從大夫後助祭太廟見廡中木主稱壽春八王爲高伯祖考寶應七王爲曾伯祖考禮官誤矣

四年太祖謂中書省臣太廟之祭以功臣配列廡間今既定太廟合祭禮朕以祖宗具在使功臣故舊沒者得少依神靈以同享祀不獨朝廷宗廟盛典亦以寓朕不忘功臣之心於是禮官議凡合祭時爲黃布幄殿中祖考神位旁設兩壁以享親王及功臣令大臣分獻制可已而命去布幄

明會典四年罷廟庭幃設之次改設黃布幃殿于廟內併具兩廡中居祖考神位廡列親王及功臣每奠獻祖考則遣大臣各分獻不讀祝是秋又命功臣仍于廡間配享不設布殿

蕙田案親王配享自太祖創也

太祖本紀洪武六年錄故功臣子孫未嗣者二百九人

九年新太廟成增祀蒙城王妃田氏盱眙王妃唐氏以徐達常遇春李文忠鄧愈湯和沐英俞通海張德勝胡大海趙德勝耿再成桑世傑十二位配于西廡罷廖永安

明會典洪武九年奉安四代神主以親王并王妃二十一位侑于殿內東壁功臣十二位配于西壁不分獻自是四時之祭皆行合享之禮

明史太祖本紀洪武十年錄故功臣子孫五百餘人明會典洪武二十年定凡祭功臣令軍官首領官陪明史禮志建文時禮部侍郎宋禮言功臣自有雞籠山廟請罷太廟配享帝以先帝所定不從且令候太廟享

畢別遣官卽其廟祭之

洪熙元年以張玉朱能王真姚廣孝配享太廟遣張輔朱勇王通及尚寶少卿姚繼各祭其父

王圻續通考嘉靖九年中允廖道南言廣孝髡徒不宜入廟禮官李時與張璫桂萼亦以爲言遂移祀大興隆寺

明史禮志嘉靖十年以刑部郎中李瑜議進劉基位次六王

十六年以武定侯郭勛奏進其祖英初二廟功臣位各以爵及進基位公侯上至是復令禮官議合二廟功臣敘爵於是列英於桑世傑上張玉朱能於沐英下基於世傑下

王圻續通考武定侯郭勛乞進其祖英侑享高廟下

廷議不可戶部侍郎唐胄疏爭言廟祀諸臣位次上下且不可易況有無之額敢輒增損乎勛言往年進劉基祔享以文臣故舉朝翕然順從臣祖英武臣乃紛然阻忌上是勛言進英祀先是二廟侑享功臣位各以爵及進基伯位公侯上帝不喜曰何上基而下英也令禮官考議乃合二廟功臣敘爵于是列英永義侯上河閒東平二王黔甯王下基永義侯下初郭英未進侑時禮官夏言言禮有功宗之祀漢祭功臣于廟庭魏祀尚書令荀攸于太祖廟唐高祖至憲宗廟或六七八人或二三人宋太祖至光宗亦然如魏徵李沆司馬光皆文臣不必皆武功也守成諸君亦各有與享者不必皆創業也我朝二祖開國靖難固有功臣仁宗以無事武功其閒相與輔贊治平豈

無有如魏徵李沆輩者今侑享二祖凡十七人十七人中惟基廣孝二人文臣耳自後六廟缺焉無聞乞下廷議考求六朝文武大臣有功在當時澤在後世者請上裁定進侑廟庭帝不允

配享功臣十七人中山武甯王徐達開平忠武王常遇春岐陽武靖王李文忠甯河武順王鄧愈東甌襄武王湯和黔甯昭靖王沐英河閒忠武王張玉東平武烈王朱能虢國忠烈公俞通海蔡國忠毅公張德勝越國武莊公胡大海梁國武桓公趙德勝泗國武莊公耿再成營國威襄公郭英甯國公王真永義侯桑世傑誠意伯劉基皆左右敘

二十四年進諸配位於新太廟西壁罷分獻

天常紀神宗萬曆九年給事中丁汝謙言諸王世次

遠宜罷祭於墓親王之塲無後而近者宜配凡親王功臣宜列兩廡上以汝謙議睿廟謫汝謙遂未行萬曆十四年太常卿裴應章言諸王本從祖祔食今四祖之廟已祧而諸王無所於祔宜罷享而祔之祧廟禮部言祧以藏毀廟之主為祖非為孫禮有祧不聞有配祧者請仍遵初制序列東廡為近禮報可

又言廟中列后在上異姓之臣禮當別嫌且至尊拜俯於下諸臣之靈亦必不安命復改西廡遣官分獻

太常紀裴應章言諸王從祖祔食四祖親盡且祧而諸王得配享百世非所以為殺也壽春等王於太祖為伯為兄太祖南面而伯若兄俯而侑于側非所以為順也列后在享諸功臣同坐一堂非所以為別也其以諸王祔廟歲祫則祔餘則罷功臣移之廡便

上下禮官宗伯沈鯉議曰臣考儀禮諸書與前代故事無親王祔享之儀是太祖以義起者也宗廟之祭祫為重故禮稱彌遠而彌尊時享不可預而預於祫其無乃未安乎竊謂諸王墳墓近皇陵則祔皇陵之廟近祖陵則祔祖陵之廟于禮無嫌亦不失太祖遺意但考洪武四年初享十五王之文曰朕念親親之道無閒存沒凡我伯考兄姪悉追封為王伯妣先嫂皆為王夫人列祀宗廟著為常典臣不敢議罷其仍遵初制序列東廡功臣列西廡惟上裁擇上曰可於是諸王功臣列兩廡遣官分獻如國初制矣天啟元年太常少卿李宗延言前代文臣皆有從祀我朝不宜獨缺下禮部議不行

春明夢餘錄明高祖定鼎念諸功臣之烈建太廟首

以李韓公善長等六人及胡越公大海等從享最後
韓公坐嫌死而六公亦閒不得與逮永樂而始定自
中山開平二王而下距永義侯桑世傑凡六王五公
一侯十二人從文皇祀者至洪熙而定文武臣惟河
間王玉東平王能甯國公眞榮國公廣孝凡二王二
公至世宗首上太祖徽號後上文皇帝祖號又采禮
官言進誠意伯從祀太祖位六王下而以僧故斥廣
孝使祀大興隆寺尋用翊國公助請進其祖營國公
英獨仁宗而後寥寥無聞論者謂如楊文貞李文達
商文毅劉文清楊文忠之賢于輔而不得從蹇忠定
王忠肅王端毅馬端肅之賢于銓于肅愍之賢于樞
而不得從張定興輔之下南交朱宣平永之八佩將
印皆位太師握環衛爲心膂牙爪而不得從高帝諸
功臣而下猶有說焉若李韓公之佐開創不下鄧侯
雖以嫌死帝尙爲之諱若馮宋公勝之佐大將軍取
中原下秦隴降納哈出二十萬之眾傅頴公友德之
從大將軍取山東其平蜀功冠徹侯而開滇南二百
年之地惜其終于帝之末遭革除之變而未有舉也

右明

五禮通考卷第一百二十二

五禮通考卷第一百二十三

內廷供奉禮部右侍郎金匱秦蕙田編輯

兩淮都轉鹽運使德水盧鳳曾

李太保總督蘇省御史桐城方觀承同訂

直隸按察司副使元和宋宗元

古禮一百二十三

賢臣祀典

蕙田案祭法曰聖王之制祭祀也法施於民則祀之以死勤事則祀之以勞定國則祀之能禦大災則祀之能捍大患則祀之所以崇德報功勸忠尚義而風勵于無窮也自淫祠繁興貞邪淆亂歷代以來祠宇之在天下者廢興不一或以正而被黜或以濫而見推典籍所垂蓋綦溷矣今根據正史旁及傳記舉勳庸德行忠節孝義卓然表見者著于篇其

不在祀典及通考所載淫祠俱竝削焉

禮記祭法聖王之制祭祀也法施於民則祀之以死勤事則祀之以勞定國則祀之能禦大災則祀之能捍大患則祀之

劉氏彝曰法施於民者民賴其法以身者也以死勤事者忠於國者弗顧其生義於君者弗惜其死祀之則忠義勸於天下矣以勞定國者夙夜勞瘁弼成王業如伊尹之相湯升陞如呂望之薦揚我武如周公之坐以待旦也能禦大災者如洪水為災而後土氏能平五土懷襄昏墊而夏后氏能滌九源既免民之魚鼈又敷土以播殖也能捍大患者如獫狁猾夏而宣王斥之管蔡亂國而周公征之揚墨亂教而孟子闢之皆俾大患弗克興焉陳氏祥道曰法施於民所謂民功曰庸也以死勤事以勞定國所謂事功曰勞也能禦天之災捍捍人之大患所謂治功曰力也

右秩祀典

書武成封比干墓

傳封益其土 疏周本紀云命闕天封比干之墓

禮記樂記封王子比干之墓

注積土為封封比干墓崇賢也

蕙田案封墓則有祀事可知廟與墓同

吳越春秋夫差帥諸羣臣出國門祀子胥于江濱諸臣

竝在夫差乃言曰寡人昔不聽相國之言乃用讒佞之辭至令相國遠沒江海自亡以來濛濛惑惑如霧蔽日莫誰與言泣下沾襟哀不自勝左右羣僚莫不悲傷

蕙田案此祀忠臣之始

右周

漢書昭帝本紀元鳳元年三月賜郡國所選有行義者涿郡韓福等五人帛人五十匹遣歸詔曰朕聞勞以官職之事其務修孝弟以教鄉里令郡縣常以正月賜羊酒有不幸者賜衣被一襲祠以中牢

日知錄漢書萬石君傳石慶為齊相齊人為立石相祠于定國傳父于公為縣獄吏郡中為之立生祠號曰于公祠漢紀欒布為燕相有治績民為之立生祠此後世立生祠之始

後漢書明帝本紀永平二年十一月甲申遣使者以中
牢祠蕭何霍光帝謁陵園過式其墓

章帝本紀建初七年冬十月西巡狩幸長安丙辰遣使
者以中牢祠蕭何霍光

安帝本紀延光三年閏十月乙未遣使者以中牢祀蕭
何曹參霍光

桓帝本紀延熹八年夏四月丁巳壞郡國諸房祀
注房謂祠堂也王渙傳曰時唯密縣存故太傅卓茂

廟洛陽留今王渙祠

桓譚傳元和中肅宗行東巡狩至沛使使者祀譚冢鄉
里以為榮

楊厚傳厚年八十一卒于家策書弔祭鄉人謚曰文父
門人為立廟郡文學掾史春秋饗射常祠之

孔融傳融為北海相郡人甄子然臨孝存知名早卒融
恨不及之乃命配食縣社

蕙田案兩漢風俗淳茂祀典所及見于史冊
者蕭曹與霍皆有相業功在社稷桓譚以經
學博聞名後世卓茂韓福等以行義稱至于
民間亦立生祠有甘棠之愛焉百世而下猶
為興起況當其時者乎逮漢末諸君子皆以
行義風節相矜尚所由來者遠矣

右兩漢

宋書禮志劉禪景耀六年詔為丞相諸葛亮立廟於沔
陽先是所居各請立廟不許百姓遂私祭之而言事者
或以為可立于京師乃從人意皆不納步兵校尉習隆
中書侍郎向允等言于禪曰昔周人懷召伯之美甘棠

爲之不伐越王思范蠡之功鑄金以存其像自漢興以來小善小德而圖形立廟者多矣況亮德範遐邇勳蓋季世王室之不壞實斯人是賴而烝嘗止于私門廟象闕而莫立百姓巷祭戎夷野祀非所以存德念功述追在昔也今若盡從人心則瀆而無典建之京師又逼宗廟此聖懷所以惟疑也愚以爲宜因近其墓立之於沔陽使所屬以時賜祭凡其故臣欲奉祀者皆限至廟斷其私祀以崇正禮於是從之

蕙田案孔明爲漢季第一人物故當爲三國

祠祀之冠

三國蜀志秦宓傳宓同郡王商爲治中從事商爲嚴君平李宏立祠宓與書曰疾病伏匿甫知足下爲嚴李立祠可謂厚黨勤類者也觀嚴文章冠冒天下由夷逸操

山嶽不移使揚子不歎固自昭明如李仲元不遭法言令名必淪其無虎豹之文故也可謂攀龍附鳳者矣如揚子雲潛心著述有補于世泥蟠不滓行參聖師于今海內談詠厥辭邦有斯人以耀四遠怪子替茲不立祠堂蜀本無學士文翁遺相如東受七經還教吏民于是蜀學比于齊魯故地里志曰文翁倡其教相如爲之師漢家得土盛於其世仲舒之徒不達封禪相如制其禮夫能制禮造樂移風易俗非禮所秩有益于世者乎雖有王孫之累猶孔子大齊桓之霸公羊賢叔術之讓僕亦善長卿之化宜立祠堂速定其銘

魏志賈逵傳逵子充嗣豫州吏民追思之爲刻石立祠青龍中帝東征乘輦入逵祠詔曰昨過項見賈逵碑像念之愴然古人有言患名之不立不患年之不長逵存

有忠勳沒而見思可謂死而不朽者矣其布告天下以勸將來

魏略曰甘露二年車駕東征屯項復入達祠下詔曰達沒有遺愛歷世見祠追聞風烈朕甚嘉之昔先帝東征亦幸於此親發德音褒揚達美徘徊之心益有慨然夫禮賢之義或埽其墳墓或修其門閭所以崇敬也其埽除祠堂有穿漏者補之

宋書禮志魏武帝少時漢太尉橋元獨先禮異焉故建安中遣使祀以太牢文帝黃初六年十二月過梁郡又以太牢祀之

右三國

晉書元帝本紀太興元年十二月癸巳詔曰漢高經大梁美無忌之賢齊師入魯修柳下惠之墓其吳之高德

名賢或未旌錄者具條列以聞

蕙田案此後世鄉賢孝義旌表之意

禮志故事祀臯陶於廷尉寺新禮移祀于律署以同祭先聖於太學也故事祀以社日新禮改以孟秋之月以應秋政摯虞以為案虞書臯陶作士師惟明克允國重其功人思其當是以獄官禮其神繫者致其祭功在斷獄之成不在律令之始也太學之設義重太常故祭于太學是崇聖而從重也律署之置卑于廷尉移祀于署是去重而就輕也律非正署廢興無常宜如舊祀于廷尉又祭用仲春義取重生改用孟秋以應刑殺理未足以相易宜定新禮皆如舊制可

羊祜傳祜既卒襄陽百姓于峴山祜平生游憩之所建碑立廟歲時饗祭焉望其碑者莫不流涕杜預因名為

墮淚碑

宋書武帝本紀義熙十三年正月公以舟師進討軍次留城令修張良廟

文選傅亮為宋公修張良廟教夫盛德不泯義存祀典微管之歎撫事彌深張子房道亞黃中照鄰殆庶風雲元感蔚為帝師夷項定漢大拯橫流固已參軌伊望冠德如仁若乃神交圯上道契商洛顯默之際宵然難究淵流浩漭莫測其端矣途次舊沛佇駕留城靈廟荒頓遺像陳昧撫跡懷人永歎實深過大梁者或佇想于夷門游九原者亦流連于隨會擬之若人亦足以云可改構棟宇修飾丹青蘋蘩行潦以時致薦抒懷古之情存不刊之烈士者施行

宋書武帝本紀永初二年夏四月己卯朔詔曰淫祠惑

民費財前典所絕可竝下在所除諸房廟其先賢及以勳德立祠者不在此例

禮志永初二年普禁淫祠由是蔣子文祠以下普皆毀絕

劉穆之傳元嘉二十五年四月車駕行幸江甯經穆之墓詔曰故侍中司徒南康文宣公穆之秉德佐命翼亮景業謀猷經遠元勳克茂功銘鼎彝義彰典策故已嗣徽前哲宣風後代者矣近因遊踐瞻其塋域九原之想情深悼歎可致祭墓所以申永懷

禮志漢時城陽國人以劉章有功于漢為之立祠青州諸郡轉相倣效濟南尤盛至魏武帝為濟南相皆毀絕之及秉大政普加除翦世之淫祀遂絕
孝武帝孝建初更修起蔣山祠

文帝本紀元嘉二十六年遣使祭晉故司空忠肅公何無忌之墓

禮志孝武帝大明三年二月戊申行幸藉田經左光祿大夫袁湛墓遣使致祭

五年庚午車駕行幸經司空殷景仁墓遣使致祭

王宏傳大明五年車駕遊幸經宏墓下詔曰故侍中中

書監太保錄尚書事揚州刺史華容文昭公宏德猷光

劭鑒識明遠故散騎常侍左光祿大夫太子詹事豫章

文侯曇首夙尚恬素理心真正竝綢繆先眷契闊屯夷

內亮王道外流徽譽以國圖令勛民思茂惠朕薄巡都

外瞻覽墳塋永言想慨良深于懷便可遣使致祭墓所

禮志大明七年十一月南巡乙酉遣使祭晉司馬桓溫

征西將軍毛璩墓

右晉宋

北魏書孝文帝本紀太和十有八年春正月癸亥車駕

南巡戊辰經比干之墓祭以太牢 十有九年九月壬

辰遣黃門郎以太牢祭比干之墓

宣武帝本紀正始元年六月戊戌詔立周且夷齊廟于

首陽山

北史劉芳傳芳轉太常卿以周公之祀不應隸太常

乃上疏曰周公廟所以別在洛陽者蓋緣姬旦創成

洛邑故傳世洛陽崇祠不絕以彰厥庸夷齊廟者亦

世為洛陽界內神祠今竝移太常恐乖其本詔曰所

上乃有明據但先朝置立已久且可從舊

李孝伯傳孝伯兄子安世出為相州刺史假節趙郡公

敦農桑斷淫祠西門豹史起有功于人者為之修飾廟

堂

右北魏

隋書煬帝本紀大業二年五月乙卯詔曰旌表先哲式存饗祀所以優禮賢能顯彰遺愛朕永鑒前修尙想名德何嘗不興歎九原屬懷千載其自古以來賢人君子有能樹聲立德佐世匡時博利殊功有益于人者竝宜營立祠宇以時致祭墳壟之處不得侵踐有司量爲條式稱朕意焉

舊唐書太宗本紀貞觀四年九月壬午令自古賢臣烈士墳墓毋得芻牧春秋致祭

七年十二月丙辰狩于少陵原詔以少牢祭杜如晦杜淹李綱之墓

高宗本紀顯慶二年冬十月遣使祭鄭大夫國僑漢太

邱長陳寔墓

文獻通考麟德二年車駕將封岱嶽至滎陽頓祭紀信墓

唐書狄仁傑傳仁傑入拜冬官侍郎持節江南巡撫使吳楚俗多淫祠仁傑一禁止凡毀千七百房止留季札伍員而已天授二年以地官侍郎同鳳閣鸞臺平章事會爲來俊臣所構乃貶仁傑彭澤令邑人爲置生祠萬歲通天中擢仁傑爲魏州刺史民愛仰之復爲立祠舊唐書元宗本紀開元十九年夏四月丙申令兩京及天下諸州各置太公尙父廟以張良配享春秋二時仲月上戊日祭之

冊府元龜開元十二年十一月幸東都敕有司所經忠臣烈士墓精意致祭以酒脯時果用代牲牢

唐書禮樂志開元十九年始置太公尚父廟牲樂之制如文宣出師命將發日引辭于廟仍以古名將十人為十哲配享

蕙田案祀尚父可也以古名將為十哲陋矣厥後更有七十二賢異哉

冊府元龜詔立太公廟制乾坤沖用陰陽所以運行帝王大業文武所以垂範故四序在乎平分五材資于並用式稽乾坤之意載明文武之道永言舊章斯典未洽自我而始爰備闕文昔羲皇立弧矢之象黃帝有甲兵之事將以定禍亂濟生靈分二柄而齊設配兩儀而其久至若用之以仁義行之以禮樂龍豹卷舒而莫測星辰應變而無方誰其尸之則齊太公之道也故宣尼大聖立文以成化尚父惟師仗武而宏訓齊魯之道列親

賢之教興鬱為政源崇我王業遂使金石之奏永播於蹲龍之庭烝嘗之享不行于非熊之室文武並設斯不然矣豈王風云季禮沒于前修將帥是尊慶彰于今日式崇大典垂裕後昆宜令兩京及天下諸州各置太公尚父廟一所以張良配享春秋二時取仲月上戊日祭諸州賓貢武舉人準明經進士行鄉飲酒禮每出師命將辭訖發日便就廟引辭仍簡取自古為將功業顯著康濟生人者十人準十哲例預享

舊唐書元宗本紀天寶元年冬十月辛丑改驪山為會昌山仍于秦坑儒之所立祠宇以祀遭難諸儒

蕙田案諸儒不在祀典明皇此一祭真足千古

冊府元龜天寶七載五月詔曰式閭表墓追賢紀善事

有勸于當時義無隔于異代其忠臣義士史籍所載德行彌高者所在置一祠宇量時致祭

文獻通考殷相傳說郡汲殷太師箕子郡汲宋公微子郡睢陽

殷少師比干郡汲齊相管夷吾郡濟南齊相晏平仲郡濟南晉卿

羊舌叔向郡絳魯卿季孫行父郡魯鄭卿東里子產郡滎陽燕

上將軍樂毅郡上谷趙卿藺相如郡趙楚三閭大夫屈原郡長沙

漢大將軍霍光郡平陽漢太傅蕭望之郡萬年漢丞相丙吉郡魯

蜀丞相諸葛亮郡南陽已上忠臣一十六人

周太子吳太伯郡吳伯夷郡齊吳延陵季札郡丹陽魏

將軍紀信郡滎陽已上義士八人

周太王妃太姜郡新平周王季妃太任郡扶風周文王妃太姒

長安縣配魯大夫妻敬姜郡魯鄒孟軻母郡魯陳宣孝婦郡睢陽

曹世叔妻大家郡扶風已上孝婦七人

周宣王齊姜郡長沙衛太子恭姜郡汲楚莊樊姬郡富水楚昭王

女郡高水宋恭伯姬郡睢陽梁宣高行郡陳留齊杞梁妻郡濟南趙將趙

括母郡趙漢元帝馬昭儀郡咸陽成帝班婕妤郡扶風漢太傅王

陵母郡武漢御史大夫張湯母郡萬年漢河南尹嚴延年母

東海郡漢淳于緹縈郡濟南已上烈女一十四人右竝令郡縣

長官春秋二時擇日準前致祭

邱氏濬曰後世祭忠臣義士孝婦烈女始于此

唐書肅宗本紀上元元年閏四月己卯追封太公望為

武成王

禮樂志上元元年尊太公為武成王祭典與文宣王比

以歷代良將為十哲象坐侍秦武安君白起漢淮陰侯

韓信蜀丞相諸葛亮尚書右僕射衛國公李靖司空英

國公李勣列于左漢太子少傅張良齊大司馬田穰苴
吳將軍孫武魏西河守吳起燕昌國君樂毅列于右後
罷中祀遂不祭

冊府元龜上元元年詔曰定禍亂者必先于武德拯
生靈者諒在于師貞周武創業克甯區夏惟師尚父
實佐興王況德有可師義當禁暴稽諸古昔爰崇典
禮其太公望可追封為武成王有司依文宣王置廟
享祭之典一同文宣

蕙田案尚父之祠必欲以配文宣何哉

建中二年五月有司奏定張良穰苴孫武吳起樂毅
白起韓信諸葛亮李靖李勣配武成王廟先是開元
十九年始于兩京置齊太公廟以張良配乾元中追
封齊太公為武成王令選歷代名將從祀然未之行

祠宇日荒至是宰相盧杞京兆尹盧諶以盧者齊之
裔乃鳩其裔孫若盧崔丁呂之族合錢以崇飾之請
擇自古名將如孔門十哲皆配享詔下史官乃定穰
苴等至是始奏定焉

蕙田案觀此則出于姦相之懷私崇飾審矣
禮樂志建中三年禮儀使顏真卿奏治武成廟請如月
令春秋釋奠其追封以王宜用諸侯之數樂奏軒縣詔
史館考定可配享者列古今名將凡六十四人圖形焉
越范蠡齊孫臏趙廉頗秦王翦漢曹參周勃李廣霍去
病後漢鄧禹賈復寇恂馬援皇甫嵩魏張遼蜀關羽吳
周瑜陸遜晉羊祜王濬東晉謝元燕慕容恪宋檀道濟
梁王僧辯北齊慕容紹宗周宇文憲隋韓擒虎史萬歲
唐尉遲敬德蘇定方張仁亶王峻王孝傑齊管仲田單

趙趙奢李牧漢彭越周亞夫衛青趙充國後漢吳漢馮
異耿弇段熲魏鄧艾蜀張飛吳呂蒙陸抗晉杜預陶侃
前秦王猛後魏長孫嵩宋王鎮惡陳吳明徹北齊斛律
光周于謹韋孝寬隋楊素賀若弼唐河間郡王孝恭裴
行儉郭元振張齊邱郭子儀

貞元二年刑部尚書關播奏太公古稱大賢下乃置亞
聖義有未安而仲尼十哲皆當時弟子今以異時名將
列之弟子非類也請但用古今名將配享去亞聖十哲
之名自是惟享武成王及留侯而諸將不復祭矣

貞元四年兵部侍郎李紆言開元中太公廟以張良配
以太常卿少卿三獻祝文曰皇帝遣某敢昭告至上元
元年贈太公以王爵祭典同文宣有司遂以太尉獻祝
版親署夫太公周之太師張良漢之少傅今至尊屈禮

于臣佐神何敢歆且文宣百世所宗故樂以宮縣獻以
太尉尊師崇道也太公述作止六韜勳業著一代請祝
辭不進署改昭告為敬祭留侯為致祭獻官用太常卿
以下百官議之多請如紆言左司郎中嚴況等議曰案
紆援典訓尊卑之節當矣抑猶有未盡夫大名徽號不
容虛美而太公兵權奇計之人耳當殷之失德諸侯歸
周遂為佐命祀典不云平法施于人則祀之如仲尼祖
述堯舜憲章文武刪詩書定禮樂使君君臣臣父子
子皆宗之法施于人矣貞觀中以太公兵家者流始令
磻溪立廟開元漸著上戊釋奠禮其進不薄矣上元之
際執事者苟意于兵遂封王爵號擬文宣彼于聖人非
倫也謂宜去武成王號復為太公廟莫享之制如紆請
刑部員外郎陸淳等議曰武成王殷臣也紆暴不諫而

佐周傾之夫尊道者師其人使天下之人入是廟登是堂稽其人思其道則立節死義之士安所奮乎聖人宗堯舜賢夷齊不法桓文不贊伊尹殆謂此也武成之名與文宣偶非不刊之典也臣愚謂罷上元追封立廟復礮溪祠有司以時享斯得矣左領軍大將軍令狐建等二十四人議曰兵革未靖宜右武以起忠烈今特貶損非勸也且追王爵以祠祀為武教主文武竝宗典禮已久改之非也乃詔以將軍為獻官餘用紆奏自是以上將軍大將軍將軍為三獻

蕙田案尙父廟在唐追崇逾制獻享非禮幾

同淫祠矣李紆陸淳議正大不刊

文獻通考昭宗天祐二年封楚三閭大夫屈原為昭靈侯舜帝二妃祠為懿節祠

右隋唐

宋史太祖本紀建隆三年九月壬申修武成王廟禮志昭烈武成王自唐立太公廟春秋仲月上戊日行祭禮上元初封為武成王始置亞聖十哲等後又加七十二弟子梁廢從祀之祭後唐復之太祖建隆三年詔修武成王廟與國學相對命左諫議大夫崔頌董其役仍令頌檢閱唐末以來謀臣名將勳績尤著者以聞太祖本紀乾德元年七月丁卯幸武成王廟禮志建隆四年帝幸廟歷觀圖壁指白起曰此人殺已降不武之甚何受享于此命去之案本紀建隆四年十一月改元乾德文獻通考開寶三年十月詔前代功臣烈士宜令有司詳其勳業優劣以聞有司言齊孫臏晏嬰晉公孫杵臼燕樂毅漢曹參陳平韓信周亞夫衛青霍去病霍光蜀

主劉備關羽張飛諸葛亮唐房元齡長孫無忌魏元成
李靖李勣尉遲敬德渾瑊段秀實等皆勳業高邁為當
時之冠晉趙簡子齊孟嘗君趙奢漢丙吉唐高士廉
唐儉岑文本馬周為之次南燕慕容德唐裴寂郭元振
又其次詔孫贖等各置守冢三戶趙簡子等各兩戶悉
蠲其役慕容德等禁樵采其有為盜賊所發者皆具棺
槨朝服以葬掩坎日致祭長史奉其事

邱氏濬曰宋有司所品第前代功臣烈士為三等皆
據其有冢墓存者爾歷代勳德之名固不止此然其
所品第者乃一人之見非萬世公論也

開寶六年詔許州修晁錯廟

真宗咸平四年詔西京修後唐河南尹張全義祠堂遣
使葺益州諸葛亮廟

宋史真宗本紀景德元年冬十月壬午詔修葺歷代聖
賢陵墓

禮志景德元年詔前代名臣賢士義夫節婦墳壟並禁
樵采摧毀者官為修築無主者碑碣石獸之類敢有壞
者論如律仍每歲首所在舉行此令鄭州給唐相裴度
守墳三戶賜秦國忠懿王錢俶守墳三戶

宋史真宗本紀景德四年二月己巳幸西京經漢將軍
紀信冢司徒魯恭廟贈信太尉恭太師癸酉置國子監
武成王廟戊子加號列子增封唐孝子潘良瑗及其子
季通墓仍禁樵采

文獻通考景德四年以唐刑部尚書白居易孫利用為
河南府助教常令修奉墳塋影堂又令鄭州給唐相裴
度守墳三戶

宋史真宗本紀大中祥符元年十一月戊午追諡齊太公曰昭烈武成王令青州立廟周文公曰文憲王曲阜縣立廟

文獻通考大中祥符元年十月詔曰周文公旦制禮作樂誕稟聖賢煥乎舊章垂之千載今以上封岱嶽按蹕魯郊遊覽遺風緬懷前烈始公胙土實維是邦故其嗣君得用王祭而祠宇未設闕孰甚焉特議褒崇以申旌顯可追封文憲王于曲阜縣建廟春秋委本州長吏致祭

邱氏濬曰自唐以前竝祀周公而以孔子配自後專祀孔子而周公無廟誠闕典也後世宜為建廟于魯地一視孔子有司歲祀用釋奠儀但不通祀于天下庶于報祀之典為稱

宋史真宗本紀大中祥符四年二月乙丑詔葺夷齊祠文獻通考大中祥符四年祀汾陰駐蹕河中府令訪伯夷叔齊廟遣官致祭緣路名臣祠廟神帳畫壁竝加葺治禁唐相婁師德墳墓樵采

宋史仁宗本紀慶曆四年五月壬申幸武成王廟禮志初建隆議升歷代功臣二十三人舊配享者退二十二人慶曆議自張良管仲而下依舊配享不用建隆升降之次

文獻通考神宗元豐三年詔前代百辟卿士載于祀典者皆不名

宋史神宗本紀元豐四年五月戊申封晉程嬰為成信侯公孫杵曰為忠智侯立廟于絳州

文獻通考元豐四年承議郎吳處厚言程嬰公孫杵曰

保全趙孤乞加封爵詔河東河北漕臣訪其祠墓嬰封成信侯杵曰封忠智侯立祠于墓側載之祀典

青箱雜記神宗朝皇嗣屢闕余嘗詣閣門上書乞立程嬰公孫杵曰廟優加封爵以旌忠義庶幾鬼不為厲使國統有繼是時適值鄆王服藥上覽之矍然即批付中書授臣將作監丞敕河東路訪尋二人遺跡乃得其冢于絳州太平縣詔封嬰為成信侯杵曰為忠智侯因命絳州立廟歲時致祭余所上言略曰臣嘗讀史記世家考趙氏廢興之本末惟程嬰公孫杵曰二人各盡死不顧難以保全趙氏孤兒最為忠義乃知國家傳祚至今皆二人之力也蓋下宮之難屠岸賈殺趙朔趙同趙括趙嬰齊已赤族無噍類惟朔妻有遺腹匿于公宮既而免身生男屠岸賈聞知索

于宮中甚急于是朔妻置男袴中祝曰趙宗不滅若無聲及索兒竟無聲乃得脫然則兒之無聲蓋天有所祚且天方啟趙氏生聖人以革五代之亂拯天下于湯火之中而奄有焉使聖子神孫繼繼承承而不已則兒又安敢有聲蓋有聲則不免不免則趙氏無復今日矣然雖天祚亦必賴公孫杵曰謬負他嬰匿于山中卒與俱死以絕其後患又必賴程嬰保持其孤遂至成人而立之以續趙祀即趙文子也于是趙宗復盛十世傳至武靈王而遂以強大與秦俱霸其後為秦所併子孫蕩析居散民間今常山真定中山則古之趙地也故趙氏世為保州人而僖祖順祖翼祖宣祖皆生于河朔以至太祖啟運太宗承祧真宗紹休仁宗守成英宗繼統陛下續業向使趙氏無此

二人以力衛襁褓孑然之孤使得以全則承祀無遺
育矣又安能熾昌以至于此故臣深以謂國家傳祚
至今皆二人之力也二人死皆以義甚可悼痛雖當
時趙武爲嬰服三年喪爲之祭奠春秋祠之世世勿
絕然今不知其祠所在竊慮其祠或廢而弗舉或舉
而弗葺或葺而弗封三者皆闕典也左氏曰鬼有所
歸乃不爲厲自宋有天下甲子百二十二年于茲矣
而二人忠義未見褒表廟食弗顯故仁宗在位歷年
至多而前星不耀儲嗣屢闕雖天命將啟先帝以授
陛下然或慮二人精魂久無所歸而亦因是爲厲也
何哉蓋二人能保趙孤使趙宗復續其德甚厚則趙
宗之續國統之繼皆自二人爲之也況二人者忠誠
精剛洞貫天地則其魂常遊于太空而百世不泯臣

今欲朝廷指揮下河東北晉趙分域之內訪求二人
墓廟特加封爵旌表如或自來未立廟貌卽速令如
法崇建著于甲令永爲祀典如此則忠義有勸亦可
見聖朝不負于二人者矣

東軒筆錄元豐中屢失皇子有承議郎吳處厚詣閣
門上書願遣使尋訪程嬰公孫杵臼冢墓飾祠加封
主上卽命尋訪未數月得二冢于絳州太平縣之趙
村大建廟以時致祭

蕙田案二忠原有可祀之禮但以皇嗣爲言
非篤論也

判應天府張方平言司農寺近降新制募人承買祠廟
然闕伯主祀大火爲國家盛德所乘微子開國于宋亦
本朝受命建號所因張巡許遠以孤城死賊能捍大患

請免此三廟以稱國家嚴奉之意詔司農寺鬻天下祠廟辱國瀆神莫此為甚可亟寢之令開封府劾官吏以

聞

宋史神宗本紀元豐六年春正月丙午封楚三閭大夫屈平為忠潔侯

大學衍義補元豐六年太常寺言請自今諸神祠加封無爵號者賜廟額已賜額者加封爵初封侯再封公次封王先有爵位者從其本號婦人之神封夫人再封如其封號者初二字再加四字如此則錫命馭神恩禮有序從之

邱氏濬曰前代鬼神皆有封號贈諡至本朝始詔革天下神封其詔略曰忠臣烈士雖可加以封號亦惟當時為宜夫禮所以明神人正名分不可以僭差今

命依古定制凡歷代忠臣烈士亦皆當時初封以為寶號後世溢美之稱皆與革去庶幾神人之際名正言順于禮為當用稱朕以禮祀神之意嗚呼聖祖此詔一洗千古之謬可以為萬世法矣

宋史禮志元豐中國子司業朱服言釋奠文宣王以國子祭酒司業為初獻丞為亞獻博士為終獻太祝奉禮竝以監學官充及上戊釋奠武成王以祭酒司業為初獻其亞獻終獻又讀祝捧幣令三班院差使臣充之官制未行武學隸樞密院學官員數少故差右選今武學隸國子監長貳丞簿官屬已多請竝以本監官充攝行事仍令太常寺修入祀儀

文獻通考哲宗元祐三年廣南經略司言儂寇之亂康州趙師巨封州曹觀邕州蘇緘戰死請為立祠載祀典

從之

宋史哲宗本紀元祐五年冬十月丁酉詔定州韓琦祠

載祀典

文獻通考詔相州商王河亶甲冢沂州顏真卿墓並載

祀典

元祐七年詔賜唐韓愈潮州廟為昌黎伯廟賜唐柳宗

元羅池廟為靈文廟又詔蘇州吳泰伯廟以至德為額

元祐八年賜安州雲夢縣楚令尹鬬穀於菟子文祠為

忠應廟封崇德侯

大學衍義補紹聖二年禮部侍郎黃裳請詔天下州軍

籍所在祠廟略敘本末如圖經命曰某州祀典從之

邱氏濬曰天下之神祠多矣有一方專祀者又有天下通祀者專祀者則俾有司考求其所以為神之故有何功烈有何靈驗始於何代詳著其姓氏爵位及歷代有無封號其通祀者惟于所生及遊宦之地詳其始末其他處則著其建置祠宇歲月及在此靈應之跡命祠部輯為一書以備稽考

宋史哲宗本紀紹聖三年六月癸亥令真定立趙普廟

文獻通考紹聖三年詔德州漢大中大夫東方朔廟以

達隱為額又封辯智侯

元符三年臣僚言案史記言韓厥之功不在程嬰杵臼

之下請于神德廟設位從祀從之

宋史徽宗本紀崇寧元年六月癸丑詔封伯夷為清惠

侯叔齊為仁惠侯

政和元年正月壬申毀京師淫祠一千三十八區

禮志大觀中尚書省言神祠加封爵等未有定制迺並

給告賜額降敕已而詔開封府毀神祠一千三十八區

遷其像入寺觀及本廟仍禁軍民擅立大小祠秘書監

何志同言諸州祠廟多有封爵未正之處如屈原廟在

歸州者封清烈公在潭州者封忠潔侯永康軍李冰廟

已封廣濟王近乃封靈應公如此之類皆未有祀典致
前後差誤宜加稽考取一高爵為定悉改正之他皆倣
此故凡祠廟賜額封號多在熙甯元祐崇甯宣和之時
其新立廟若何承矩李允則守雄州曹瑋帥秦州李繼
和節度鎮戎軍則以有功一方者也韓琦在中山范仲
淹在慶州孫冕在海州則以政有威惠者也王承偉築
邠州河隄工部員外郎張夏築錢塘江岸則以為人除
患者也封州曹觀德慶府趙師旦邕州蘇緘恩州通判
董元亨指揮使馬遂則死于亂賊者也若王韶于熙河
李憲于蘭州劉滬于水洛城郭成于懷慶軍折御卿于
嵐州作坊使王吉于麟州神堂砦各以功業建廟寇準
死雷州人憐其忠而趙普祠中山韓琦祠相州則以鄉
里皆載祀典焉

邱氏澹曰徽宗之世崇尚神怪之事願于神祠乃加毀壞其時雖非而所行則
是也朱子謂後世有儒生的神道人心邪向他便盛如狄仁傑只留泰伯伍
子胥廟壞了許多廟其鬼亦不能為害這是他見得無這物事了上蔡云可者
欲人致生之故其鬼神不可者欲人致死之故其鬼不神可見鬼神不能自神
所以神不神由
人心之向背也

政和二年武學諭張滋言詩云赫赫南仲維師尚父文
武吉甫顯允方叔王命召虎程伯休父是均為周將功
著聲詩今昔所尊惟一尚父而南仲吉甫之徒不預配
食餘如卻縠之說禮樂敦詩書尉繚以言為學者師法
不當棄而不錄請竝配食博士孫宗鑑亦請以黃石公
配後有司討論不定國子監丞趙子崧復言之宣和五
年禮部言武成王廟從祀除本傳已有封爵者其未經
封爵之人齊相管仲擬封涿水侯大司馬田穰苴橫山
侯吳大將軍孫武滬濱侯越相范蠡武遂侯燕將樂毅
平虜侯蜀丞相諸葛亮順興侯魏西河守吳起封廣宗

伯齊將孫臏武清伯田單昌平伯趙將廉頗臨城伯秦
將王翦鎮山伯漢前將軍李廣懷柔伯吳將軍周瑜平
虜伯于是釋奠日以張良配享殿上管仲孫武樂毅諸
葛亮李勣竝西向田穰苴范蠡韓信李靖郭子儀竝東
向東廡白起孫臏廉頗李牧曹參周勃李廣霍去病鄧
禹馮異吳漢馬援皇甫嵩鄧艾張飛呂蒙陸抗杜預陶
侃慕容恪宇文憲韋孝寬楊素賀若弼李孝恭蘇定方
王孝傑王峻李光弼竝西向西廡吳起田單趙奢王翦
彭越周亞夫衛青趙充國寇恂賈復耿弇段熲張遼關
羽周瑜陸遜羊祜王濬謝元王猛王鎮惡斛律光王僧
辯于謹吳明徹韓擒虎史萬歲尉遲敬德裴行儉張仁
亶郭元振李晟竝東向凡七十二將云

蕙田案七十二將以擬七十二賢不經甚矣

王圻續通考徽宗宣和間加封徽州府烏聊山廣惠王
廟隋末盜起郡人汪華有保障功後因立廟祀之

燕翼貽謀錄皇朝追褒先賢皆有所因仁宗景祐元年詔封扁鵲為神應侯以
上疾愈醫者許希有請也徽宗崇寧元年二月封孔鯉泗水侯孔伋沂水侯崇
先聖之廟也六月封伯夷清惠侯叔齊仁惠侯重節義之風也宣和元年封列
禦寇冲虛觀妙真君莊周微妙元通真君尚虛無之教也然仁宗因醫者之請
姑勉從之伯魚子思之封以配享從例也伯夷叔齊遜于乘
之國豈求身後虛名莊列物外又何羨真君之號不必封可也

文獻通考高宗建炎元年十一月丙寅郊赦歷代忠臣

烈士有功于民載在祀典者命所在有司祭之

宋史禮志紹興二年駕部員外郎李愿奏程嬰公孫杵

臼於趙最為功臣神宗命絳州立廟歲時奉祀今廟宇

隔絕祭亦弗舉宜于行在所設位望祭從之

高宗本紀紹興十一年八月戊辰立祚德廟于臨安祀

韓厥

禮志紹興十一年五月國子監丞林保奏竊見昭烈武

肅王享以酒脯而不用牲牢雖曰時方多事禮用綿絕然非所以右武而勵將士也乞今後上戊釋奠用牲牢以管仲至郭子儀十八人祀于殿上從之又紹興十一年中書舍人朱翌言謹案晉國屠岸賈之亂韓厥正言以拒之而程嬰杵臼皆以死匿其孤卒立趙武而趙祀不絕厥之功也宜載之祀典與嬰杵臼並享春秋之祀亦足為忠義無窮之勸禮寺言崇甯間已封厥義成侯今宜依舊立祚德廟致祭

高宗本紀紹興二十二年秋七月甲午朔加封程嬰公孫杵臼韓厥為公升中祀

禮志紹興十六年加嬰忠節成信侯杵臼通勇忠智侯厥忠定義成侯後改封嬰強濟公杵臼英略公厥啟信公升為中祀

高宗本紀紹興二十二年十一月壬寅詔立張叔夜廟

于信州

王圻續通考高宗時李綱為相請褒恤仗節死義者乃贈李若水觀文殿學士諡忠憫霍安國延康殿學士劉韜資政殿學士安國立廟於河南懷州二人廟未詳所在

死節副總管劉惟輔立廟于鞏昌成縣額號忠烈

知徐州王復死節立忠烈廟

知吉水熊彥明禦賊死立廟祀之

金騎渡江武昌郡守李宜嬰城固守被殺建祠祀焉賜額忠義

李彥仙守陝州拒金城陷死詔立廟以祀賜號忠烈

知永豐趙訓之與尉陳自仁力禦金以衛孟太后皆遇害詔贈官立廟以祀

左翼軍都統崔亮從高宗駕南渡領兵戍漳州以討寇戰沒立廟死所賜額表忠

趙令晟知黃州禦金不屈而死

詔諡忠憫立廟祀之賜額顯忠 延平府陳諫議祠祀
陳忠肅公瓘 賜雷州寇萊公祠額曰旌忠 紹興時
山陰蔡定父革坐法被繫時年七十餘法當免繫鞠胥
持不可定詣府請代弗許定知父終不可贖也仰天呼
曰父老而刑定生何益自赴河而死府帥聞之驚曰真
孝子也立命出革厚為定具棺殮而撫周其家且請於
朝為立廟賜額曰愍孝 劉晏擊賊賊方於宣城被害
贈官立廟 楊邦乂死節于建康創祠聚寶門外額曰
褒忠邦乂廬陵人廬陵舊有三忠祠祀歐陽修胡銓與
邦乂嘉定末又益以周必大楊萬里為四忠一節祠一
節指邦乂也 鄧瓊叛統制官喬仲福張景以不從亂
被殺立廟祀之名喬張廟 太行義士王忠植屢敗金
師後以所部赴援為叛將趙惟忠執送金人而死事聞

贈官建祠 宿遷人魏勝起兵復山東後與金戰援兵
不至墜馬死詔諡忠壯立廟鎮江之蒜山祀之額曰褒
忠 廣信州鄭驤張叔夜前後死節知州建雙廟合祀
之 金主亮南侵統制姚興力戰父子俱死詔即其地
立廟及復淮西又立廟又于戰所立廟賜額曰旌忠
滁州守劉位屢敗金兵金遣使招之位斬其使未幾出
戰中流矢死詔建廟滁陽賜號剛烈 揚州守將元怡
梁宏張昭與金戰死立三將軍廟 揚州統制王方魏
全與金力戰而死立廟曰旌忠 陳希造從父清流縣
丞告老禦賊於武平死之汀人建祠祀焉 澠池人張
玘以家財募兵與金人戰于海州中流矢死孝宗命祀
于戰所 莆田郭義重事親至孝母喪廬于墳傍甘露
降白鵲馴集及卒為立廟名郭孝子祠後元孫道卿子

廷煒俱以孝聞并繪像以祀名三孝子祠 武翼郎袁章與賊戰死立廟于仙遊邱所亦戰死附祀焉廟名靈惠袁侯祠 李巨為劉豫守大名密謀取豫歸宋事泄而死朝廷贈官立祠曰憫忠

蕙田案南宋及金元賢臣祠祀王圻續考臚載頗詳第年月多失考今芟其繁蕪摘其卓然不磨者彙附于每朝之末後同

宋史孝宗本紀乾道三年二月甲申為知陳州陳亨祖立廟于光州賜名愍忠

五年十一月丙寅為岳飛立廟于鄂州 禮志六年詔武成王廟升李晟于堂上降李勣于李晟

位次仍以曹彬從祀先是紹興間右正言都民望言李勣勳邪說誤國唐祀幾滅李晟有再造王室之勳宜升李

晟于堂上置李勣于河間王孝恭之下至是著作郎傅伯壽言武成廟從祀出于唐開元間一時銓次失于太雜如尹吉甫之伐獫狁召虎之平淮夷實亞鷹揚之烈陳湯鬱介子馮奉世班超之流皆為有漢之雋功在晉則謝中禮述在唐則王忠嗣張巡輩皆不得預從祀之列竊聞邇日議臣請以本朝名將從祀謂宜并詔有司討論歷代諸將為之去取然後與本朝名將繪于殿廡亦乞取建隆建炎以來驍俊忠槩之臣功烈暴于天下者參陪廟祀故有此命

孝宗本紀淳熙元年二月辛巳為郭浩立廟于金州 十一年冬十月壬午詔諸以忠義立廟者兩淮漕臣繕

治之 王圻續通考孝宗隆興初環慶路統制強寬及其弟震

皆為金人所執不屈死贈官立廟額曰旌忠 柳寇犯
永州境都巡檢使王政被執罵賊以死賜廟額褒忠
宋史甯宗本紀嘉泰四年夏四月甲午朔立韓世忠廟
于鎮江府五月癸未追封岳飛為鄂王
王圻續通考甯宗時常熟令孫應時建吳公祠以祀子
游朱子記曰案太史公志孔門諸子多東州之士獨子
游為吳人縣有巷名子游有橋名文學圖經又言公之
故宅在縣西北而舊井存焉公為此縣之人不誣矣
開禧中蘄州通判秦鉅與郡守李誠之協力禦金人城
破自刎死子渾浚從父皆死詔封誠之正節侯鉅義烈
侯立廟蘄州 吳昉知荆門軍鍾相之黨攻城昉闔室
被害二子雍澧在襁褓間得免詔立廟于軍城南賜額
英愍 楊震仲權知大安軍不從吳曦之叛飲藥死詔

謚節愍賜廟曰旌忠 南安洞賊入泰和大肆焚掠縣
著姓蕭必顯蕭伯達起義兵保障一方事聞徵必達賜
以爵凡死于陣者立廟祀之額曰忠義 金人攻鳳陽
統制韓存秦允以所部血戰死之立祠曰忠義 江西
洞寇犯南雄境郡守趙善傑督戰與其子汝振司法黃
樞俱死立祠于保昌縣 洞寇犯南雄境摧鋒將梁滿
戰死立梁侯祠祀之
理宗寶慶時南雄建四先生祠以祀周子二程及朱子
真西山 建朱文公祠于建安其季子在嫡孫鑑從士友
有記 之請也建安又有游御史祠祀游酢有胡文定祠祀胡
安國皆在府學內有屏山劉文靖公祠祀劉子翬在府
治南朱文公祠一在浦城一在晉江一在南安一在龍
溪一在仙遊一在同安又建甯府守王栻建書院以祀

文公理宗賜額曰建安家廟 南平縣有道南祠祀楊
時而以羅李朱三公配 循州興甯縣尉顏公袞禦賊
遇害主簿徐千能等皆被害邑人立廟祀之 建康都
統吳從龍爲元人所獲使至秦州城下誘降終不屈死
之詔廟祀揚秦二州 胡斌以殿司裨將從童德興討
汀寇賊大至斌率兵死戰殺賊甚眾血凝兩肘雙刃既
折復以鐵鞭擊之旣而力不支至蓮塘前遇害死猶執
鞭強立不仆數日郡人賴其拒戰獲奔免者數萬賊退
後民哀泣爲殮葬卽其地枹祠祀之事聞賜額曰忠勇
端平時建興孝祠于東陽縣祀吳孝子斯敦晉孝子
許孜許生唐孝子應先唐君裕馮子華凡六人 黃復
判滁州力禦元兵死立廟祀之 建呂成公祠于金華
府治西以公弟忠公配 嘉熙中都承旨王桎上武都

郎趙師櫛死賊爲立廟祀之詔賜額曰忠愍廟在尤溪
縣 制置使丁黼子榮爲其父明戰死立廟石埭額曰
褒忠 荆湖制置使孟珙以荆襄死節之臣請建祠致
祭賜額曰愍忠 淮安副總管耿世安爲賈似道調往
漣水軍增戍鏖戰而死贈官立廟淮安賜額忠武 海
州通判侯富與山東李松壽戰死詔卽海州立廟賜額
旌忠 開慶中知臨江府軍陳元桂死節立廟死所賜
額褒忠 景定二年八月贈江淮大都督李壇檢校太
師賜廟額曰顯忠壇李全之子自歸宋爲元所殺 三
年建永慕廟于義烏孝子顏烏墓左烏秦時人負土築
墳羣烏啣土助之口爲之傷故縣名烏傷後改義烏
度宗咸淳中蘭溪金景文事親至孝親沒廬墓夜有五
色光焰爛然射墓上人以爲孝感所致知縣沈應龍以

景文及陳天隱董少舒名請于朝立碑建祠于學宮之
後名三賢堂 蘇州郡守袁說友建范文正公祠于義
宅之東撥田以供常祀命其後主之又專建范氏祠堂
于學內祀仲淹及其子純仁純禮純祐純粹又長山興
化慶陽邠州皆有范文正公祠蓋其遺澤所存也 靜
江節度使牛富死于樊城詔贈官諡忠烈立廟于建康
知沔州曹友聞與弟萬同禦元兵于雞冠隘死之贈
諡曰節賜廟額曰褒忠 邊居誠守新城竭力禦元師
城陷自殺立廟 王彥明守蘄州力禦元兵不敵率家
屬同沈水中立廟祀之 永福縣黃大夫與元兵戰至
洪面爲賊所斬身首異處猶能持其頭就頸口憤憤欲
言鄉人憐而祀之曰龜嶺廟 密祐爲江西都統禦元
不敵被執不屈死立廟

恭帝德祐元年建昌降于元吳楚材還其鄉糾集民兵
力圖恢復後爲敵所執遣降人府錄訊之曰汝何爲錯
舉楚材曰不錯不錯如府錄所爲乃錯耳身上綠袍何
自而得乃爲敵用吾一鄙儒爲國出力事雖不成正不
錯也竟爲寇所殺益王立于福州贈官朝奉郎卽邵武
境上立廟賜額忠勇 元兵逼南雄僉判邱必明不屈
爲賊所殺白血流地立祠祀之 元兵至安仁提刑謝
枋得調淮士張孝忠逆戰孝忠擊殺百餘人尋中流矢
死立祠祀之號張將軍廟 馬發知潮州事元兵逼潮
戰敗服鳩死立馬公祠祀之 鞏信從文天祥趨永豐
戰于方石嶺中數矢傷重不能戰自投崖石死立廟祀
之 吳興太守趙良禦元兵不屈夫婦俱死郡人立雙
節廟 湛侯重南昌縣人事親孝執親喪廬墓側致白

兔馴擾人感其化立廟祀之 武平縣有三公祠記錄
參陳希造知縣顏東老縣尉鍾伯福以三公皆禦寇而
死也 邵武監軍劉純死節立廟祀之賜額曰忠 贛
州府學內有八先生祠祀周濂溪程明道伊川張橫渠
朱晦菴張南軒呂東萊又增程大中珣為八先生 福
建政和縣有陳徵君祠祀陳朝老蔡季通嘗觀其遺像
曰徵君骨相巖稜宜其不享富貴朱子應聲曰富貴不
如名節香 光州有司馬溫公祠二一在光州儒學內
一在光山縣治西

右宋

王圻續通考遼聖宗統和十六年以耶律休哥留守南
京禦宋有功詔立祠于南京
道宗清甯間以耶律曷魯佐太祖創業有功詔立祠于

上京又以于質調和太后定世宗之位免穆宗于難有
誅賊之功詔上京立祠樹碑 壽隆五年以舊臣姚景
行忠賢詔為立祠

金史章宗本紀明昌五年正月乙亥以葉魯谷神始製
女直字詔加封贈依倉頡立廟塾屋例祠于上京納里
渾莊歲時致祭令其子孫拜奠本路官一人及本千戶

春秋二祭

禮志明昌五年正月陳言者謂葉魯谷神二賢創置女
直文字乞各封贈名爵建立祠廟令女直漢人諸生隨
拜孔子之後拜之有司謂葉魯難以致祭若金源郡貞
獻王谷神則既以配享太廟矣亦難特立廟也有旨令
再議之禮官言前代無創制文字入孔子廟故事如于
廟後或左右置祠令諸儒就拜亦無害也尙書省謂若

如此恐不副國家厚功臣之意遂詔令依蒼頡立廟于
塾屋例官爲立廟于上京納里渾莊委本路官一員與
本千戶春秋致祭所用諸物從宜給之

完顏匡等言我朝創業功臣禮宜配祀于是以秦王宗
翰同子房配武成王而降管仲以下又躋楚王宗雄宗
望宗弼等侍武成王坐韓信而下降立于庶又黜王猛
慕容恪等二十餘人而增金臣遼王賽也等其祭武成
王宗翰子房各羊一豕一餘共用羊八無豕宣宗遷汴
于會朝門內闕庭之右營廟如制春秋上戊之祭仍舊
王圻續通考宣宗興定中完顏陳和尚死節于鈞州佗
滿胡土門死節于臨洮皆立像祀之廟曰褒忠

右遼金

元史祭祀志凡忠臣義士在祀典者所在有司主之

武成王立廟于樞密院公堂之西以孫武子張良管仲
樂毅諸葛亮以下十人從祀每歲春秋仲月上戊以羊
一豕一犧尊象尊籩豆俎爵樞密院遣官行三獻禮
仁宗本紀至大四年二月庚午立淮安忠武王伯顏祠
于杭州

祭祀志功臣之祠惟故淮安忠武王立廟于杭春秋二
仲月次戊祀以少牢用籩豆簠簋行酌獻禮若衛國文
正公許衡廟在大名順德忠獻王哈刺哈孫廟在順德
武昌者皆歲時致祭

仁宗本紀皇慶元年三月乙丑命河南省建故丞相阿
木祠堂

延祐三年夏四月壬午敕衛輝昌平守臣修殷比干唐
狄仁傑祠歲時致祭

王圻續通考仁宗時寇犯吉安廬陵人羅明遠恢復郡城而死立廟祀之 福州總管張仲儀建錢聖妃廟錢氏捐十萬緡創木蘭坡以護田救民坡垂成而敗錢氏投水死故祀之

元史英宗本紀至治二年三月己丑命有司建木華黎祠于東平仍樹碑閏五月戊戌封諸葛忠武侯為威烈忠武顯靈仁濟王

泰定帝本紀泰定二年五月丙子置建議書院于昌平縣祀劉蕡 四年秋七月建橫渠書院于郿縣祀宋儒張載

致和元年夏四月甲寅改封唐柳州刺史柳宗元曰文惠昭靈公

文宗本紀至順元年冬十月賜伯夷叔齊廟額曰聖清

歲春秋祀以少牢

順帝本紀至元六年七月詔封微子為仁靖公箕子為

仁獻公比干加封為仁顯忠烈公

至正十三年二月甲寅中書省臣言徐州民願建廟宇生祠右丞相脫脫從之

王圻續通考順帝時游弘道為化州路通判海寇犯境戰死祀于文廟側 萬方李鉉守延平與寇戰沒立廟

台州總管達兼善與方國珍戰死立祠祀之賜額曰崇節 連江巡檢劉濬為江西賊王善斫其手指及兩

腕兩足罵賊愈厲遂斷其喉舌以死立祠福州歲時致祭 漳州路達魯花赤迭理迷實死節建祠祀之賜額

曰表忠 王伯顏知福甯州為邵武賊王善所執挺頸受刃頸斷湧白液如乳暴屍數日色不變子相與婦潘

氏及三女亦同死御史余闕以狀聞命本州立廟祀之
賜額曰節孝廟 江州總管李黼與徐壽輝力戰同姪
秉昭皆死諡忠文立廟九江賜額崇烈 十二年陳友
定據閩逼閩人詹翰使從己翰固拒不從死之里人爲
立祠墓側 陳祐守會稽有惠政遇盜而死父老請留
葬不得乃立祠祀之

右元

明史禮志鄱陽湖忠臣祠祀丁普郎等三十五人南昌
忠臣祠祀趙德勝等十四人太平忠臣廟祠花雲王鼎
許瑗金華忠臣祠祀胡大海皆太祖自定其典
太祖時應天祀陳喬楊邦乂姚興王鎮成都祀李冰文
翁張詠均州祀黃霸密縣祀卓茂松江祀陸遜陸抗陸
凱龍州祀李龍遷建甯祀謝夷甫彭澤祀狄仁傑九江

祀李黼安慶祀余闕韓建之李宗可

王圻續通考明太祖吳元年命建忠臣祠于鄱湖之康
郎山上謂中書省臣曰崇德報功國之大典自古兵爭
忠臣烈士以身殉國英風義烈雖死猶生子與陳友諒
戰于鄱陽湖將臣效忠死敵昭然可數然有功不報何
以慰死者之心而激生者之志哉爾中書其議行之中
書省以死事之臣丁普郎張志雄韓成宋貴陳兆先余
旭昌文貴王勝李信陳弼劉義徐公輔李志高王咬住
姜潤石明王德朱鼎王清常德勝王鳳顯丁宇王仁汪
澤王理陳冲裴軫王喜仙袁華史德勝常推德曹信遂
德山鄭興羅世榮等三十五人列進遂封勳爵有差建
祠設像歲時祭之
春明夢餘錄洪武初禮部奏請如前代故事立武學仍

建武成王廟上曰立武學是分文武爲二輕天下無全才矣三代以前文武兼備用無不宜如太公之鷹揚而授丹書仲山甫之賦政而式古訓召虎之經營而陳文德豈比于後世武學止講韜略不事經書專習干戈不聞俎豆拘拘于一藝偏長哉今建武學又立武成王廟是近世之陋規也太公宜從祀帝王廟其武學武成王廟罷之

蕙田案自唐建武成王廟見譏儒者至于從祀諸將忽進忽退忽升忽降尤無義理數百年間實爲非禮之祀明祖此詔探本窮源如豁雲霧處置盡善厥後文臣多講武略如于少保王文成等竝著奇勳豈非有以風勵使然哉

觀承案孔廟外另立武成王廟此最不學無識者之所爲也自唐始建而宋元因之直至明祖而始罷之卓矣哉振興一代文明之治于是乎權輿矣

明史禮志漢秣陵尉蔣忠烈公子文晉咸陽卞忠貞公壺宋濟陽曹武惠王彬南唐劉忠肅王仁瞻元衛國忠肅公福壽俱以四孟朔歲除應天府官祭惟蔣廟又有四月二十六日之祭

太祖本紀洪武二年春正月乙巳立功臣廟於雞籠山禮志太祖旣以功臣配享太廟又命別立廟於雞籠山論次功臣二十有一人死者塑像生者虛其位正殿中山武甯王徐達開平忠武王常遇春岐陽武靖王李文忠甯河武順王鄧愈東甌襄武王湯和黔甯昭靖王沐

英羊二豕二西序越國武莊公胡大海梁國公趙德勝
巢國武壯公華高號國忠烈公俞通海江國襄烈公吳
良安國忠烈公曹良臣黔國威毅公吳復燕山忠愍侯
孫興祖東序郢國公馮國用西海武莊公耿再成濟國
公丁德興蔡國忠毅公張德勝海國襄毅公吳禎蘄國
武毅公康茂才東海郡公茆成羊二豕二兩廡各設牌
一總書故指揮千百戶衛所鎮撫之靈羊十豕十以四
孟歲暮遣駙馬都尉祭初胡大海等歿命肖像于卞壺
蔣子文之廟及功臣廟成移祀焉
太祖本紀洪武八年春正月增祀雞籠山功臣廟一百
八人

錢謙益雞鳴山功臣廟考上太祖實錄洪武二年正
月乙巳立功臣廟於雞籠山六月丙寅功臣廟成論

次諸臣之功以徐達爲首次常遇春又次李文忠鄧
愈湯和沐英胡大海馮國用趙德勝耿再成華高丁
德興俞通海張德勝吳良吳禎曹良臣康茂才吳復
茅成孫興祖凡二十有一人命死者塑像祀之仍虛
生者之位初胡大海等沒上命塑其像于卞壺蔣子
文之廟至是復塑像於新廟是祀也掌在太常記在
會典二百餘年已來未之有改也太倉王世貞獨考
其誤以謂國初之封六王韓魏鄭曹宋衛也立廟之
時韓宋猶未受封何以知其不令終而絀之黔甯
是時官不過指揮何以知其必樹大勳而驟登之此
記事者之誤也然則云何曰塑像虛位誠有之其後
如韓宋者則弗克與享也今之位次據永樂初年見
在者而書之也王氏之考覈矣而未及詳也夫豈惟

黔甯故初封二十八侯何以獨舉五人繼封十二侯何以獨舉一人自蘄國以外皆以有功待封者也若黔國則與黔甯比肩者也如國史之云其所謂論次者以何爲援據乎國史於二年旣云論次諸臣之功定祀二十一人矣七年六月書祀祭新戰沒定遼衛指揮高茂等三十八人八年正月又書增祀華雲龍李思齊等一百八十八人九年又書祀祭何文輝及有功者一百八十八人十三年又書祀祭顧時以下二百八十八人以二年之定祀者爲是則七年以後不宜增以七年後之增祀者爲是則二年之祀未嘗定同是祀典同是國史而前後舛錯如此此所謂以子之矛陷子之盾者也虛位塑像王氏以爲誠有之吾以爲非也二年正月上敕中書省臣曰諸將相從捐軀戮力開

拓疆宇有其事而不覩其成建功而未食其報追思功勞痛切朕懷其命有司立功臣廟於雞籠山序其封爵爲像以祀之九年七月又諭禮官曰諸將始從征伐宣力效勞朕於爵賞不敢吝惜大者公小者侯死者之像繇九年之諭觀之則云報死者之功其辭意甚明也今果有生者虛位之事則立廟之日甯不以此明諭省臣而獨諄復於死者耶羅鶴記云雞鳴山廟祀定於洪武十五年斯又與二年何異一統志云南京功臣廟建于洪武二十年嘉靖中科臣禮官駁郭威襄配享之議皆援以爲證且謂黔甯東甌此時尙在以實生者虛位之說雖然宋穎涼三公與長興武定二侯皆無恙也如宋穎涼三公者將先虛位

而後紕之耶長興武定或先虛位而後不及補耶王景撰黔甯神道碑云王薨之明年塑像功臣廟敕太常祀以太牢令二十年位次已定則黔甯之塑像何以待其薨之明年耶傳曰豫凶事非禮也記曰之生而致死之不仁而不可爲也以皇祖之神聖觀會通以行典禮而繆鑿若是耶故生者虛位之說吾斷以爲無之

雞鳴山功臣廟考下然則二十一人之祀其定于何時乎曰吾未有徵也其殆當聖祖末年胡藍二黨底定諸公侯之以罪誅者以嫌死者芟夷旣盡而後二十一人之論次始定乎國初文臣則平章武臣則都督指揮皆得祔祭洪武圖志云功臣廟在雞鳴山南凡本朝開國元勳功在社稷澤及生民者則祀於此

志刻于洪武二十八年豈聖祖末年嘗汰除祔祭文武諸臣而獨舉元勳之祀乎考之會典正祭中山以下六人配以郢國以下十五人兩廡各立一牌總書故指揮千百戶衛所鎮撫之靈蓋舉汰除祔祭諸臣而合祀之一統志所載定於洪武二十年者庶幾近之雖然二十一人之論次果出自聖祖其權衡未有不曲當者也今則猶有猜焉六王吾無間然矣六王以下梁國六公皆與享太廟者也而永義獨不在二十一人之列享祀之禮莫重于太廟古所謂其從與享先王與祭於大烝者也舉其重而廢其輕於義何居二年正月丁未以功臣廖永安等配享太廟四年四月定合祭功臣配享之禮永安等七人之配享太廟舊矣不知何時革而爲六也六年賜永安等七

人諡號九年加贈十三年改封鄖國聖祖之追念永安未嘗少殺也鄭曉謂九年罷永安祀者誤也然則太廟之黜鄖國殆未必出聖祖之意矣功臣廟之祀又安得而黜之如謂德慶之獲罪足以累其兄則泗國獨無宋國爲之弟而虢國獨無南安爲之弟乎然則永義鄖國之不祀功臣廟者非定論也國初死事諸臣與於兩序者梁國五公之外濟國安國東海燕山四人而已在太平則有東邱輩而不得與在南昌則有隴西忠節輩而不得與在康山則有濟陽清河高陽安定輩而不得與至於陷虜剖腹如樂浪者以督府峻贈上公而亦不得與東邱諸公縱不得與梁國六公等獨不當與濟國東海燕山相上下乎樂浪之忠烈又豈少遜於安國乎如謂東邱諸公死事之

地已有特祠則梁國不當祀于南昌而越國不當祀於金華乎故吾謂濟國四人之祀其於以報國初死事之臣殆有未盡也此亦非定論也開國功臣以逆誅以嫌死者例不得與享其有生封侯死封公贈諡稠疊而亦不得與者身死之後黨事發露如滕杞陝許芮永諸公是也滕國之祔祭已見於國史蓋祔而後黜者也獨吳海國儼然從其兄之後廟食至今何居庚午五月之詔播示天下者海國不在二十七人之列乎其罪狀未明縱不比於滕杞諸公又豈獨後於陝國乎陝國不祀而海國祀其何以服陝國之心乎海國之得祀於祀爲不典於國爲失刑此未必聖祖之意也恐亦非定論也以位次考之其載在會典者東序則馮郢國以下七人西序則胡越國以下八

人與今廟中位次相合吳江國在西序吳海國在東序皆居第五躋海國于江國之上斯為越祀矣實錄則云次胡大海次馮國用皆西先於東江國兄弟適當其次而華高丁德興序於俞魏國張蔡國之上則以配享太廟之元勳抑而居下又未可謂之順祀也繇此推之二十一人位次實錄會典彼此錯互已不可考正一統志之所載未知何所援據又豈可遽信哉吾學周禮其可為三歎已矣然則嘉靖中太廟配享之議如何曰文成宜與享太廟者也進威襄於二十一人之列吾無譏焉爾

王圻續通考洪武中余忠宣廟在安慶府忠節坊祀元右丞余闕余為元死節推官黃大倫以下三十三人皆從闕死咸附祀 知府許瑗與行樞密院判王鼎共守

太平寇至城陷瑗鼎被執罵賊而死踰月城復立祠祀之 忠烈公祠在開州治東元郭嘉盡忠所事洪武初旌其忠烈立祠致祭 許遠廟在海甯縣西五代梁初建後增祀唐中丞張巡宋併祀南霽雲雷萬春姚鼐洪武初以海甯故鹽官乃遠所生因獨祀遠 岳武穆王廟在杭州岳飛墓側 靈衛廟在杭州宋建炎間金兵犯臨安錢塘令朱蹕暨二將金勝祝威率民兵力戰死之

明史禮志永樂三年以中山王勳德第一又命正旦清明中元孟冬冬至遣太常寺官祭於大功坊之家廟牲用少牢

明會典宋文丞相祠永樂六年建每歲春秋仲月用羊一豕一果品五帛一遣順天府尹行禮

春明夢餘錄宋丞相文信國祠在郡學西乃元之柴市公授命所永樂六年太常博士劉履節奉命正祀典謂天祥忠于宋室而燕京乃其死節之所請祠祀從之祠堂三楹前爲門又前爲大門祠之西爲懷忠會館江右士大夫歲時集會于此以祭公者也趙

齊

奉明夢餘錄永樂中始載漢壽亭侯祠于祀典

王圻續通考仁宗洪熙中建方氏祠在甯海縣祀方正學孝儒父子

明史禮志宣宗時高郵祀耿遇德

英宗時豫章祀韋丹許遜無錫祀張巡

王圻續通考英宗正統三年都督方政征麓川力戰死節諡忠毅立祠祀之李忠定祠在邵武府正統四年

改建在府學東祀李綱

景帝景泰中永豐縣知縣鄧融死節配享于張叔夜祠祠在廣信府

英宗天順間慶遠府同知葉禎父子同死事贈官祀之明史禮志憲宗時崖山祀張世傑陸秀夫

王圻續通考憲宗成化五年建褒忠廟在漳州府城東

祀元漳州路達魯花赤迭理彌實死節

于少保忠節祠在崇文門內東表背巷公故賜宅也祠

三楹祀少保兵部尚書于謙塑公像危坐歲春秋遣太

常寺官致祭

春明夢餘錄漢壽亭侯廟在宛平縣東成化十三年建

俗呼白馬廟隋之舊基也每歲五月十三日遣太常官

致祭

王圻續通考宏治二十三年從太常寺奏祭宋丞相文

天祥遣順天府堂上官行禮

二十六年建曾侍郎祠時巡按周盤奏曾銑謀國隕身

立祠黃巖直隸提學御史陳子員言郡邑學宮設有

鄉賢名宦二祠要以風勵表功庶幾有高山景行之思

第昔掌握于上之採訪今多有待于下之請乞原所由

來則以近世政出多門事權不一提學官不得專主之

故也夫提學官奉天璽書品藻才賢振揚風教一方文

獻皆所提衡則名宦鄉賢之秩祀皆當屬之提學官別

衙門不得越俎則職掌既專祀典益正有裨風化允行

明史禮志孝宗時新會祀宋慈元楊后延平祀羅從彥

李侗建甯祀劉子翬烏撤祀譚淵廬陵祀文天祥婺源

祀朱熹都昌祀陳澔饒州祀江萬里福州祀陳文龍興

化祀陳瓚湖廣祀李芾廣西祀馬忱

武宗時真定祀顏杲卿真卿韶州附祀張九齡子拯沂

州祀諸葛亮蕭山祀游酢羅從彥

王圻續通考武宗正德中建忠節祠于杭州祀明按察

使王良宋太學生徐應鑣霸州寇起指揮馬震力戰

死建祠祀之 瑞金縣令萬公率兵禦流賊陣亡建祠
明會典榮國恭靖公姚廣孝祠舊配享于太廟嘉靖九
年移祀大興隆寺後寺燬移崇國寺每歲春秋致祭
王圻續通考世宗嘉靖元年建楓山祠于蘭溪縣祀尚
書章懋萬歷中賜名崇儒 十四年建陽明先生祠在
餘姚縣龍泉山祀新建伯王守仁 建顯忠祠在奉化
縣祀拾遺戴德彝死建文難 文節祠在貴池縣祀宋
通判趙昂發元兵攻城昂發與妻雍氏死節嘉靖初知
府田賦以邑黃觀妻女同死忠事乃立雙忠六烈祠
褒忠廟在石埭縣祀宋制置使丁黼黼知成都與寇戰
死 旌忠祠在南昌府祀忠臣孫燧許達以馬思聰黃
宏周憲宋以枋配 忠烈祠在餘姚縣祀禮書孫燧
恭愍祠在臨海縣祀光祿卿陳選

明會典凡靖難革除間被罪諸臣隆慶六年令各地方
官查其生長鄉邑或特為建祠或即附本處名賢忠節
祠歲時以禮致祭
萬歷二年令各撫按釐正名宦鄉賢有不應入祀者即
行革黜
王圻續通考萬歷初建表忠祠在武昌府祀革除忠臣
姚善廖昇樊士信周拱辰 甯夏遊擊梁琦守備馬承
先百戶陳緒等死難建祠致祭 宋儒周敦頤父輔成
從祀啟聖祠 孫明復祠在濟南府以石守道配享
謝文節祠在九江府祀宋臣謝枋得 薛文清祠在平
陽府祀侍郎薛瑄 魏了翁祠在蘇州府祀宋參知政
事魏文靖公 陳忠愍公祠在常州府尚書陳公治死
節交趾詔建祠 正學祠在金華府祀宋儒何基王栢

元儒金履祥許謙四人 襄忠祠在汀州府祀伍驥丁
泉 大節祠在南昌府祀靖難死事諸臣黃子澄練子
甯胡閏王良周是修曾鳳韶鄒瑾王高彭與明魏冕蔡
運顏伯瑋及其子有為 參政賀興隆與賊周文貴戰
沒立祠祀之 忠節廟在奉新縣祀副使周憲吳一貫
兩廡祀舍人周幹及征華林陣亡烈士 九忠祠在台
州府祀建文死節方孝孺葉惠仲王叔英徐瑩鄭華盧
元質鄭恕盧迥及東湖樵夫 旌忠廟在揚州府宋紹
興中統制王方魏全與金人戰死立廟致祭 包孝肅
公祠在肇慶府祀宋郡守包丞相拯 忠烈廟在溫州
府祠宋教授劉士英 曹端祠在澠池縣學
明史禮志有明一代之臣抗美前史者或以功勳或以
學行或以直節或以死事臚于志乘刻于碑板匪一而

足通州祀常遇春山海關祀徐達蘇州祀夏原吉周忱
淮安祀陳瑄海州衛祀衛青徐安生甘州祀毛忠榆林
祀余子俊杭州祀于謙蕭山祀魏驥汀州祀王得仁廣
州祀楊信民毛吉雲南祀沐英沐晟貴州祀顧成廬陵
祀劉球李時勉廣信祀鄧融寶慶祀賀興隆上杭祀伍
驥丁泉慶遠祀葉禎雲南祀王禕吳雲青田祀劉基平
陽祀薛瑄杭州祀鄒濟徐善述金華祀章懋皆眾著耳
目炳然可考

日知錄大明一統志永平府名宦有唐張仲素德宗時以列將事盧龍軍節度
使張允仲擢平州刺史允仲卒詔仲素代為節度使同平章事考之新舊唐書
列傳則云張仲武為盧龍節度使破降回鶻又破奚北平及山奚威加北翟累
擢檢校司徒同中書門下平章事卒于直方多不法畏下變起奔京師軍中以
張允仲總後務詔賜旌節在鎮二十二年比歲豐登邊鄙無虞張公素以軍校
事允仲擢平州刺史允仲卒子簡會為副大使公素以兵來會喪簡會出奔詔
以公素為節度使性暴厲眸子多白燕人號白眼相公為李茂勳所襲奔京師
貶復州司戶參軍按盧龍節度使前後三人皆張姓曰仲武曰允仲曰公素今
乃合二名而曰仲素及詳其歷官即公素也又其逐簡會在懿宗咸通十三年
距德宗時甚遠且又安取此篡奪暴戾之人而載之名宦乎今濼州乃祀之名

宦詞呼其辱朝廷之典
 而貽千秋之笑也已
 又考唐時別有一張仲素字續之元和中為翰林學士有詩名舊唐書楊於陵
 傳所謂屯田員外郎張仲素白居易燕子樓詩序所謂司勳員外郎張仲素續
 之即其人也然
 非盧龍節度使
 肇慶府志宋王巨濟熙中為博羅令築隨龍蘇村二隄民賴其利後知南恩一
 統志誤作王且今博羅名宦稱宋丞相文正公前博羅令而不知文正未嘗為
 此官滔熙又孝宗年號也蓋士
 不讀書而祀典之荒唐也久矣

右明

五禮通考卷一百二十三

